

Cart De'en Nyoj Par Beṇə' Ebreo Ca'

*Diozən' babe'elene' chio'o dižə' ca de'en bsele'e
Xi'in'e'enə'*

¹ Tyemp de'en bagwde, Diozən' bsele'e zan profet beṇə' gwsoe' xtiže'enə' len de'e xaxta'ocho ca'. Zan las profet ca' gwso'e xtiže'enə' len de'e xaxta'ocho ca', nža' nža' can' gwso'en. ² Pero tyemp nga zocho na'a nža'alə babene'. Na'a babe'elene' chio'o dižə' ca de'en bsele'e Xi'in'e'enə' ben' ben yoban', yežlyon' na' de'e ca' chle'icho le'e yoban', na' bengaqe'en con can' ben Diozən' mendad. Na' gwžin ža catə' gaquə lao na Xi'in Diozən' yoguə' beṇəch, yoguə' bia ca' chsa'aš, na' biquə'əchlə de'e ca' bene'. ³ Xi'in Diozən' nse'e doxen yelə' chey che'eni' che Xe'enə' na' cayanə'an naquə yichjla'aždao' Xe' Dioz nan' naquə yichjla'aždaogüe'enə'. Na' Xi'in Diozən' chone' par nič yoban', yežlyon' na' de'e ca' chle'icho le'e yoban' chso'onən žin, chedə' nape' yelə' guac par nič chac con can' ne'enə'. Bsanlažə' cuine' gwso'ot beṇə' le' par nič chnitlaogüe' xtolə' yoguə' chio'o chonlilažə'əchone'. Na' gwde na' beyepe' yoban' zjəyechi'e cuit Xe' Diozən' ben' naquə le'ezelaogüe beṇə' zaque'e par chnabi'e txen len le'.

*Xi'in Diozən' naquəche' beṇə' zaquə'əche cle ca
angl ca'*

⁴ Na' nla'alao de que Xi'in Diozən' naquəche' beṇə' zaquə'əche cle ca angl ca', čhedə' Diozən' bab-nežjue'ene' yeḷə' bala'an mazəchlə ca de'en bab-nežjue' angl ca'. Na' babene' par ničh naquəche' beṇə' blaoch. ⁵ Diozən' bitonə' ye'e ni tozə angl can' gože' Xi'ine'enə', gože'ene':

Len' naco' xi'ina'.

Neža babena' par ničh solao nabi'o len nada'.

Na' nic ne'e güe'e dižə' čhe notə'ətezə angl can' gwne' čhe Xi'ine'enə', gwne':

Nada' gona' par ničh gacbia' naca' Xe',

na' gona' par ničh gacbia' de que naque' Xi'ina'.

⁶ Xi'in Diozən' naque' le'ezelaogüe beṇə' zaque'e. De'e na'anə' catə'an Diozən' bsele'ene' yežlyon' gwne':

Yoguə'əloḷ angl čhia' ca' cheyaḷə' əso'elaogüe'ene'.

⁷ Nach gozne' čhe angl ca':

Chona' par ničh angl čhia' ca' beṇə' ca' chso'on
mendad čhia'

chsa'aque' ca be' de'en chečh na' ca yi' bel.

⁸ Na' nža'alə can' be'e dižə' len Xi'ine'enə' gože'ene':

Len' naco' Dioz na' chnabi'o zejlicane.

Na' lechgualə güen chnabi'o.

⁹ Chebeido' de'en zda liča na' chgue'ido' de'e malən'.

De'e na'anə' nada' Diozən' ben' cho'elaogo'o

babena' par ničh zocho' mbalazəch cle ca beṇə' ljuežjo' ca'.

¹⁰ Na' de'e yoblə gož Diozən' Xi'ine'enə':

Le' naco' Xan yežlyon'.

Len' beno'on ža gwlasda'ote.

Na' yoguə' de'en chle'icho le'e yoban', leczə len' beno'on.

11-12 Na' gwžin ža catə' te che yoguə' de'en chle'icho le'e yoban' na' yežlyo nga.

Pero le' bito te chio'; syempr soczo' zejlicane.

Na' gwša' le'e yoban' na' yežlyon' ca to beṇə' chša' xe' catə' babeyoin na' chaze' yeton.

Gono' len le'e yoban' na' yežlyon' can' chon to beṇə' catə' chetobə xe'.

Pero le', tozəczə can' gaco' zejlicane, na' bito əžin iz nacho te chio'.

13 Diozən' bitonə' ye'e ni to angl ca de'en gože' Xi'ine'enə', gože'ene':

Gwche'edo' cuita' nga nabi'acho txen,

na' gona' par ničh nitə' de'e ca' chso'on contr le' na' beṇə' contr chio' ca' xni'onə'.

14 Ca naquə angl ca', yogue'e zjənaque' beṇə' chso'on mendad che Diozən', chsele'e lega'aque' par chsa'aclene' chio'o bagwlej Diozən' par ničh žjəyezochō len le'.

2

Cheyalə' əgwzenagcho che xtižə' Diozən' par ničh žjəyezochō len le'

¹ Na' laogüe de'en naquə Xi'in Diozən' beṇə' blaoch na' beṇə' zaquə'əche ca angl ca', do yichj do lažə'əcho cheyalə' əgwzenagcho xtiže'enə' de'en babenecho, chedə' la' šə bito əgwzenagcho chei do yichj do lažə'əcho, guanlažə'əchon na' cuejyichjchon. ² Lei che Diozən' de'en gosə'əyixjue'e angl ca' naquəczən de'e žialao xen. Na' de'e na'anə' Diozən' bnežjue' castigw che de'e xaxta'ocho ca' batə'ətezə cui boso'ozenague' chei segon de'e mal de'en gwso'on to toga'aque'. ³ Na' naquən segor de que Diozən' gone' chio'o castigw šə bito goncho

can' na Xancho Jesocristən'. Zgua'atec Xancho Jesocristən' be'e dižə' güen juisy can' cheyalə' goncho par nič žjəyecho len le'. Nach gwdenə' beṇə' ca' gosə'ədalen le' leczə bosə'ozejni'ine' chio'o can' gwne'enə', chedə' gosə'əneze' de que naquən güen. ⁴ Na' Diozən' bene' par nič gwso'one' miłagr na' bichlə de'e zaquə' yebanecho, na' Diozən' bnežjue' lega'aque' zan clas yelə' guac, na' Spirit che'enə' benən par nič gwso'one' de'e zan de'e güen len yelə' guac chein' segon can' gwyazlažə' Diozən', par nič ənezecho de que xtižə'əga'aque'enə' naquən de'e li.

Goc Jeso'osən' doxen can' naquə chio'o beṇačh

⁵ Catə' te che yežlyo nga na' gatə' yežlyo cobə de'en cho'a dižə' chei, Diozən' bito gone' ca yesə'anabia' angl ca'. ⁶ Na' nyoj can' gwna de'e Rei Dabin' gože' Diozən':

¿Bixčhen' chacdo' che beṇačhən'? ca naquə bitotec bi zjəzaque'e.

Na' ¿bixčhen' chaclenga'aco'one'?

⁷ Beno' par nič beṇačhən' bito zjənaque' beṇə' blao can' zjənaquə angl ca' pero caguə syempr gaquən ca'.

Bia'aczə beno' par nič zjəzaquə' beṇačhən' na' bnežjwga'aco'one' yelə' bala'an.

⁸ Beno' par nič yoguə'əlołte de'e zjəde əsa'aquən lao na' beṇačhən', na' len yoguə'əloł bia ca' chsa'aš, leczə əsa'aquəb lao na'aga'aque'.

Na' ca naquə ben Diozən' par nič yoguə'əlołte de'e zjəde əsa'aquən lao na' beṇačhən' na' yoguə' bia ca' chsa'aš leczə əsa'aquəb lao na'aga'aque', de'e

na'anə' beṇaḥən' yesə'anabi'e lao yoguə'əte de'en zjəde, la'anə'əczə n̄a'a n̄ezecho bitonə' yesə'anabi'e. ⁹ Na' ca naquə Jeso'osən', žlac goque' beṇaḥ bito goque' beṇə' blao can' zjənaquə angl ca'. Na' de'e tant n̄zi'ilažə' Diozən' chio'o beṇaḥ bene' par niḥ Jeso'osən' bsanlažə' cuine' por ni checho catə'an gwso'ot beṇə' le', na' de'e na'anə' Jeso'osən' banzi'e yelə' bala'an̄ xen na' banaquəchgüe' beṇə' zaque'e.

¹⁰ Diozən' bene' bia chsa'aš, bene' beṇaḥ na' yeziquə'əchlə de'e zjəde par niḥ chzi'e yelə' bala'an̄. Na' bene' güen ca de'en bsi'e x̄neze par niḥ gwxaquə'əzi' Jesocristən' ben' babebej chio'o xni'a de'e malən'. Na' de'en gwxaquə'əzi'enə' chac chone' par niḥ beṇə' zan əsa'aque' xi'in̄ Diozən' na' žjəsyə'anite'e len le' yoban'. ¹¹ Jeso'osən' bagwleje' chio'o par naccho lažə' na' Diozən'. De'e na'anə' txen len le' naccho xi'in̄ Diozən' na' bito cheto'ine' par əne' che chio'o de que naccho beṇə' biše'e na' beṇə' zane'. ¹² Quinga gwna Jeso'osən' gože' Diozən':

Gua'a dižə' par niḥ beṇə' biša'a ca' na' beṇə' zana' ca' yesə'ənezene' non' naco'.

Na' lao zjəndopə zjənžague' chso'elaogüe'e le', nada' gua'a dižə' ca beṇə' güennə' naco'.

¹³ Nach gwne':

Sotezə soa' gon̄ilaža'a Diozən'.

Na' de'e yoblə gozne':

Nga zoa' txen len beṇə' ca' beṇ Diozən' nada' par niḥ zjənaque' xi'in̄a'.

¹⁴ Na' chio'o naccho beṇə' belə' chen, chio'onə' naccho xi'in̄e'. De'e na'anə' leczə le' golje' goque' beṇə' belə' chen na' bsanlažə' cuine' gwso'ot beṇə' le' par niḥ bn̄itlaogüe' yelə' gwnabia' che

gwxiye'en de'en chon par niĉh chatcho. ¹⁵ Bene' par niĉh chio'o chonlilažə'əchone' bitoch žebcho gatcho. Beṇə' ca' cui chso'onlilaže'ene' syempr chəsə'əžebe' sa'ate'. ¹⁶ Jeso'osən' bide' yežlyo nga caguə par goclene' angl ca', sino par goclene' beṇə' ca' chso'onlilažə' Diozən' can' benlilažə' de'e Abraannə' Diozən'. ¹⁷ Benən byen goc Jeso'osən' doxen can' naquə chio'o beṇəĉh par niĉh ca' chaclene' chio'o lao Diozən' can' gwso'on de'e bṁoz əblao ca' len de'e xaxta'o chio'o beṇə' Izrael gwsa'aclene' lega'aque'. Cheyašə' cheži'lilažə' Jeso'osən' chio'o na' chone' complir can' ne'enə'. Can' chon Jeso'osən' be'enə' checa'a xtolə' chio'o chonlilažə'əchone'. ¹⁸ Jeso'osən' cuat bene' de'e mal pero bžaglaogüe' catə'an gwlo'oyelə' gwxiye'en le' par gone' de'e malən' na' catə' goc bitə'ətezəchlə de'e mal len le'. De'e na'anə' nezene' naclən' chone' chaclene' chio'o catə' chgo'oyelə' gwxiye'en chio'o par goncho de'e malən' na' catə' chac bitə'ətezə de'e mal len chio'o.

3

Jeso'osən' zaquə'əche' cle ca de'e Moisezən'

¹ Beṇə' bišə', laogüe de'en bagwlej Diozən' yoguə' chio'o par naccho lažə' ne'enə', cheyalə' goncho xbab ĉhe Cristo Jeso'osən' ben' bselə' Diozən' par naque' bṁoz əblao ĉhecho. Diozən' bselə'ene' bedətixjui'e xtiže'ene' de'en chejle'echo ĉhei. ² Diozən' gwleje' le' par chaclene' chio'o ca to bṁoz əblao. Na' Jeso'osən' lao bide' yežlyon' na' na'a chone' con can' na Diozən', ca'aczən' ben de'e Moisezən' ben' leczə goclene' yoguə' beṇə' gwsa'ac family ĉhe Diozən'. ³ Pero na'

Jeso'osən' zaquə'ache' cle ca Moizezən'. Jeso'os na'anə' bxie' family che Diozən' ca de'en bene' par nich chio'o chonlilažə'əcho Diozən' na'a na' len beṇə' ca' gwso'onlilažə' le' cana' naccho family che Diozən'. Na' ca naquə de'e Moizezən' ža, goque' con to beṇə' lao family che Diozən'. ⁴ Na' gwnitə' beṇə' bxē to to family nitə' lao yežlyon', pero Jeso'osən' caguə bxie' family che Dioz na'azən', sino leczə bxie' yoguə'əte de'e zjəde, chedə' len' naque' Dioz. ⁵ Na' ca naquə de'e Moizezən', bene' can' gwna Diozən' par goclene' yoguə' beṇə' gwsa'ac family che Diozən' la'anə'əczə goque' con to xmos Diozən'. Na' de'e Moizezən' be'e dižə' che de'e ca' ze'e əsa'ac ca tyempən' de'e ca' bagwsa'acquən na'a. ⁶ Cristən' leczə bene' complir can' gwna Diozən' par goclene' beṇə' zjənaquə family che Diozən'. Na' bene' ca' chedə' naquə'ce' Xi'in Diozən', caguə ca to mos. Na' family che Dioz na'anə' naquə chio'o šə zotezə zocho chonlilažə'əcho Diozən' do yichj do lažə'əcho catə'an yidə Cristən' de'e yoblə, na' šə chebeicho de'en yidə Cristən'.

Guaquə socho mbalaz len Diozən'

⁷⁻⁸ Cheyalə' goncho xbab can' gwna Spirit che Diozən' de'en nyojən nga:

Catə' Diozən' əne' to de'e gonle na'a,
bito gacle beṇə' godenag can' gwsa'ac beṇə' Izrael
ca' cana'

catə' gwso'one' contr Diozən' latjə dašən'.

Gwso'one' prueb šə leine' de que gwnežjue' castigw
cheğa'aque'enə'.

⁹ Nach Diozən' gwne':

De'e xaxta'ole ca' bito gwse'ejle'e chia' la'anə'əczə
 čoa iz besə'əle'ine' de'e ca' bena' par
 goquə'lenga'aca'ane'.

Con gwso'one' prueb šə leida'anə'.

¹⁰ De'e na'anə' bito bebeiga'acda'ane',

na' gwnia': "Do tyemp naquəga'aque' beṇə'
 yichjla'aždao' žod,

bitonə' se'enene' se'ejni'ine' can' chona'."

¹¹ Na' de'en bž'a'a lega'aque' de'e nan' gwnia'
 čhega'aque' de que cuat nite'e mbalaz len
 nada'.

¹² Legapə cuidad beṇə' bišə', par nič ni tole
 cui gacle beṇə' yichjla'aždao' mal. Lesotezə leso
 legonlilažə' Diozən' par nič cui cuejyichjlene'
 čhedə' le'enə' zoe' zejlicane. ¹³ Žlac na'a ne'e de
 tyemp par əgwzenagle čhe Diozən', legwtiplažə'
 ljuežjle tža tža par nič cui gonle de'e malən', la'
 catə' choncho de'e malən' chxoayaguən chio'o par
 nič cuich bi bi chaquecho catə'ən chonchchon.

¹⁴ Ngodə'əcho txen len Cristən' šə ne'e zotezə zocho
 chonlilažə'əchone' catə'ən yide' de'e yoblə con can'
 gwzolaoczcho chonlilažə'əchone'.

¹⁵ Na' nyoj Xtižə' Diozən' par chio'o gan' nan:

Catə' Diozən' əne' to de'e gonle na'a

bito gacle beṇə' godenag can' gwsa'ac beṇə' Izrael
 ca' cana'.

¹⁶ Na' de'en nyojən nan ca' cho'en dižə' čhe beṇə'
 ca' jəsyə'ənao de'e Moisezən' catə'ən jəyeleje'
 lega'aque' Egipton'. Boso'ozenague' can' ben
 Diozən' mendad par besyə'əchoje' Egipton', pero
 beyožzə besyə'əchoje'enə' bitoch boso'ozenague'
 čhe'. ¹⁷ De'e na'anə' bže'e lega'aque' čoa iz de'en
 gwso'one' de'e malən' cuich boso'ozenague' čhe',

na' gwsa'ate' latjə dašən'. ¹⁸ Na' Diozən' gwne' de que cuat nite'e mbalaz len le' chedə' cui boso'ozenague' che'. ¹⁹ Na' nezecho de que yelə' godenag chega'aque'enə' cui goquə nite'e mbalaz len le'.

4

¹ Na'a ža, nezecho can' goc che beṇə' godenag ca' beṇə' ca' gwsa'at latjə dašən'. De'e na'anə' cheyalə' žebcho par ničh cui goncho can' gwso'one'enə', chedə' šə goncho can' gwso'one'enə' bito gaquə socho mbalaz len Diozən' can' bene' lyebe. ² Babenecho to dižə' güen dižə' cobə de que gwaquə socho mbalaz len Diozən' ca dižə' de'en gwse'ene lega'aque'. Pero ca naquə lega'aque' de'en cui gwse'ejle'e chei, de'e nan' bito goquəlenən lega'aque'. ³ Na' chio'o chejle'echo che de'en na Diozən' bazochi mbalaz len le'. De'e na'anə' bito na Diozən' checho can' gwne' che beṇə' ca' gwne': De'en bža'a lega'aque' na' gwnia' de que cuat nite'e mbalaz len nada'.

Na' ca naquə Diozən' nezecho babeyož bxie' yoban' na' yežlyon' na' de'e na'anə' zoe' mbalaz. ⁴ Can' nyoj to part Xtiže'enə' nan:

Xop ža ben Diozən' yoban', yežlyon', beṇəchən', bia yixə'ən na' biquə'əchlə de'e zjəde.

Na' catə' bžin ža gažən', bitoch bi bi bene', con zoe' mbalaz.

⁵ Na' de'e yoblə goncho xbab che de'en gwne': Cuat nite'e mbalaz len nada'.

⁶ De'e li balə beṇə' nite'e mbalaz len Diozən'. Pero ca naquə beṇə' ca' gwse'enene' dižə' güen dižə' cobə che'enə' cana'ate, bito goquə nite'e mbalaz len le' chedə' bito boso'ozenague' che'. ⁷ Na' catə' bagwde

zan iz Diozən' gwne' de'e yoblə de que gwaquə n̄itə' beṇə' mbalaz len le'. Bene' par niḥ bzoj de'e Rei Dabin' dižə de'en na:

Catə' Diozən' əne' to de'e gonle na'a bito gacle beṇə' godenag.

⁸ De'e Josuen' gwche'e de'e xaxta'o chio'o beṇə' Izrael gan' gosə'əzi'e yežlyon' de'en bnežjw Diozən' lega'aque'. Pero lega'aque' bito gwnite'e mbalaz len Diozən'. De'e na'anə' gwdechlə Diozən' bene' par niḥ de'e Dabin' bzoje' gwne' de que gwžin ža n̄itə' beṇə' mbalaz len le'. ⁹ Nachən' nezecho de que chio'o chonlilažə'əcho Diozən' chac socho mbalaz len le'. ¹⁰ Na' beṇə' ca' banitə' mbalaz len Diozən' bitoch chso'one' can' na xbab chega'aque'enə', sino que chso'one' can' na Diozən'. De'e na'anə' nacho de que nite'e mbalaz can' zo Diozən' de'en beyož bxie' yoguə' de'e ca' zjəde. ¹¹ Na' cheyalə' yeyiljlažə'əcho nac goncho par niḥ socho mbalaz len Diozən'. Cheyalə' gwzenagcho che' par niḥ ca' ni tocho cui gac checho can' goc che de'e xaxta'ocho ca' de'en cui boso'ozenague' che Diozən'.

¹² Xtižə' Diozən' chazən lo'o yichjla'aždao' beṇə', na' chaclenən notə'ətezə choso'ozenag chei. Na' gwxaquə'əleben ca to spad de'en n̄lachgua chopə la'ate. Pero mazəchlə can' chon to spad chon Xtižə' Diozən', chedə' chlo'in chio'o no chein' chzenagcho, əche Spirit che Diozən' o šə che la'ažda'omalchon'. Leczə ca' chzejni'in chio'o che xbab de'en yo'o lo'o yichjla'ažda'ochon' na' che yoguə'əloj de'en chzelažə'əcho šə naquən güen o šə naquən mal. De'e na'anə' gwxaquə'əleben ca to spad de'e chchog entr bechj bnia ca' na' entr bin ca'. ¹³ Diozən' neze nle'ine' to to beṇach, na' to to

angl, na' to to de'e xio', na' cuantzə bi de'en zjəde. Diozən' n̄eze n̄le'ine' yichjla'ažda'ochon'. Na' laogüe' na'anə' əgwdecho cuent šə biquə' de'e babencho.

Jeso'osən' naque' b̄xoz əblao chechon'

¹⁴ Jeso'os Xi'in̄ Diozən' babeyepē' yoban' gan' zo Diozən' par gaquəlene' chio'o. De'e na'anə' Jeso'osən' naque' b̄xoz əblao checho, ben' naquə le'ezelaogüe beṇə' zaque'e. Na' de'e na'anə' cheyalə' sotezə socho gonlilažə'əchone' can' chonczcho. ¹⁵ Na' Jeso'osən', ben' naquə b̄xoz əblao chechon', chache'ine' catə' chaquecho zdebə goncho to de'e güen. Gwxiye'en gwlo'oyelə'an le' gone' de'e mal pero bito bene'en na' bžaglaogüe' cayaṇə'an chžaglaio chio'o beṇəch. ¹⁶ Na' cheyalə' güe'elencho Diozən' dižə' sin cui žebcho, əṇabechone' yezi'ixene' checho na' gaquəlene' chio'o batə'ətezə chyažjecho yelə' chaclen che'enə', chedə' le'enə' nži'ilaže'e chio'o.

5

¹ Beṇə' ca' besə'əchoj gwsa'aque' b̄xoz əblao che nasyon Izrael chechon' tyemp de'en bagwde jso'e bi de'en jso'e lao Diozən' na' gwso'ote' bia yixə' besə'əlaljē' xchenga'aquəbən' par nič Diozən' bezi'ixene' xtolə' de'e xaxta'ocho ca'. Na' yoguə' b̄xoz ca' gwsa'aque' con to beṇə'. ² Na' b̄xoz əblao ca' gwsa'ape' yelə' chxenlažə' len beṇə' ca' cuiṇə' se'ejni'i can' cheyalə' so'one' na' len beṇə' ca' bazjənxoayag len de'e malən', chedə' lecza beṇəchən' zjənaque' na' naquən zdebə par so'one' de'e güennə'. ³ Na' de'en zjənaque' beṇəchən' benən byen gwso'ote' bia yixə' na' besə'əlaljē' xchenga'aquəbən' par gosə'əṇabe' yezi'ixen Diozən'

xtolə'əga'aque'ənə' can' gosə'əṇabe' yezi'ixene'
xtolə' beṇə' ca' yelə'.

⁴ Na' notono gwleḷj cuine' par gaque' bḫoz
əblao, sino Diozən' gwleḷjga'aque' can' gwleje' de'e
Ronṇə'. ⁵ Le'egatezə ca' Cristən' bito ben cuine'
xen cuejlize cuine' par gaque' bḫoz əblao. Diozən'
gwleje'ene' na' Dioz na'anə' gože'ene':

Len' naco' Xi'ina'.

Neža babena' par niḫ solao ṇabi'o len nada'.

⁶ Na' ga yoblə nyoj yeto de'en gože'ene':

Naco' bḫoz beṇə' zo zejlicane,

na' naco' ca bḫoz Melquisedequən'.

⁷ Na' Jeso'osən' catə' gwzoe' yežlyo nga bene'
orasyon lao Xe' Diozən' ben' gac yosle'ene' par
niḫ cui gate'. Jeso'osən' gwṇe' zižjo na' gwcheže'
gwṇabe' yelə' chaclen che', na' Diozən' bzenague'
na' bene' par niḫ yelə' gotən' cui gwnabi'an le'
chedə' benlilaže'ene'. ⁸ Na' la'anə'əczə Jeso'osən'
naque' Xi'in Dioz, Diozən' bzejni'ine' le' de que
cheyalə' əžaglaogüe' par yeyož gone' yoguə'əlöl
de'e ca' naquən gone'. De'e na'anə' Jeso'osən'
bžaglaogüe' len yoguə'əlöl de'en goc che' yežlyo nga.

⁹ Na' beyož goc che' Jeso'osən' yoguə'əlöl can' gone'e
Diozən', nach gwzolao chone' par niḫ yoguə'əlöl
beṇə' ca' choso'ozenag che', ṇite'e len le' zejlicane.

¹⁰ Diozən' gwleje' le' par naque' bḫoz əblao checho
na' gwxaquə'əlebene' ca bḫoz Melquisedequən'.

*Gapcho cuidad par niḫ cui cuejyichjcho xtižə'
Diozən' de'en bachejle'echo chei*

¹¹ Na' ne'e dech de'e zan de'en che'enda' əṇia'
le'e che' de'en naquə' Jeso'osən' bḫoz chechon',
pero naquən zdebə əṇi'an par šejni'ilen, chedə'

bitoch chebeile gwzenagle che Diozən'. ¹² Bagolə' əgwsed əgwlo'ile beṇə' yeziqə'əchlə xtiž'e'ənə', pero latje de'e gonle ca', chyažjlele to beṇə' par əgwsed əgwlo'ine' le'e de'e yoblə ca de'en bab-sedle de'e nechən'. Na' laogüe de'en chyažjele əgwsedəchle de'e ca', gwxaquə'əlebele ca bidao' ca' ṇe'e chsa'ažə', bi'i cuiṇə' gac sa'o. ¹³ Na' ben' naquə ca bidao' ṇe'e chažə', bitonə' šejni'ine' xtižə Diozən' de'en naquəch zdebə. ¹⁴ Na' xtižə' Diozən' de'en naquəch zdebə gwxaquə'əleben ca yelə' guao de'en chao beṇə' cha'o. Na' beṇə' ca' chse'ejni'i len chsa'acbe'ine' che bitə'ətezə dižə šə naquən de'e li o šə naquən dižə' güenlažə'. Chsa'acbe'ine' chedə la' bazjəyo'olaogüe' choso'ozenague' che Diozən'.

6

¹ Na' ca bidao' ca' chəsə'əzolao chsa'obo' yelə' guao catə' bazjəncha'obo' ca'aczən' chio'o cheyalə' solaocho cue' yichjcho che xtižə' Diozən' de'en naquəch zdebə par nič gaquəch yichjla'ažda'ochon' can' naquə yichjla'aždao' Cristən'. Catə'ən gwzolao benlilažə'əcho Cristən' gwyejni'icho can' yedinjecho xtolə'əchon' na' bedinjechon. Na' ṇa'a bitoch chyažjən yedinjecho che de'e ca' de'e yoblə, na' nic chyažjən yezolaocho gonlilažə'əchone' de'e yoblə. ² Baṇezczechə bi zejen catə'ən chcho'acho nisən', na' lecəzə can' baṇezecho bi zejen catə'ən chxoa na'achon' yichj beṇə' yoblə chṇabcho yelə' chaclen che Diozən' par lega'aque' na' bitoch chyažjən no gwzejni'iche chio'o bi zeje de'e ca'. Le'egatezə ca' bitoch chyažjecho no gwzejni'iche chio'o can' yolis yosban Diozən' beṇə' guat ca' o can' gone' yelə' jostis che beṇə'

ca' chso'on de'e malən'. Bañezczega'aquechonṅə'.
³ Pero na'a ža, šə Diozən' güe'e latjə yeyiljlažə'əcho
 nac goncho par ničh gaquə yičhjlə'ažda'ochon' can'
 naquə yičhjlə'aždao' Cristən'.

⁴ Nitə' beṅə' bachse'ejni'i xtižə' Diozən' na'
 bazjənapə' yelə' mban zejlicəne de'en choṅ
 Diozən' chio'o chonlilažə'əchone', na' leczə ca' bazo
 Spirit che Diozən' lo'o yičhjlə'ažda'oga'aque'enə'.

⁵ Bazjənezene' ca güennə' naquə xtižə' Diozən'
 na' bazjənombi'e milagr na' bichlə yelə' guac
 che Diozən' la'anə'əczə ze'e yesə'əle'ichene'
 yelə' guac de'en gwlo'eche' catə' əžin ža gatə'
 yežlyo cobə. ⁶ Na' šə gwžinclə ža yesə'əgue'i

beṅə' ca' Diozən' šə yesə'əbejyichjcle' xtiže'enə',
 bitoch gaquə yesyə'ədinjene' xtolə'əga'aque'enə'
 de'e yoblə, chedə' lo'o yičhjlə'ažda'oga'aque'enə'
 so'one' txen len beṅə' ca' boso'oda' Xi'in Diozən'
 le'e yag corozən', na' so'one' par ničh beṅə'

yeziquə'əchlə leczə yesə'əgue'ine' le'. ⁷ Ca naquə
 yežlyo güen gan' chsa'az beṅə', šə chacchgua yejon',
 nach chac de'en chsa'aze'enə' na' chatə' de'en
 chəsə'əyazjene', na' Diozən' chebeine' de'e chac
 cwseš čhega'aque'enə'. Can' gwxaquə'əlebecho

šə zotezə zocho chzenagcho che Diozən'. ⁸ Pero
 šə bagwlejyichjcho cuich chzenagcho che Diozən'
 gwxaquə'əlebecho ca yežlyon' gan' chla'ac por
 yag yešə' na' no yixə' cuan de'e cui chac gaocho.

Yežlyon' de'en nac ca' bito bi bi zaquə'an par xan
 yežlyon', nach chbejyichje'en na' chžin ža catə'
 chzeye' de'e ca' chla'ac laogüennə'.

*Zotezə zocho chonlilažə'əcho Diozən' chedə'
 nezecho žjəyecho len le'*

9 Na' ca naquə le'e, la'anə'əczə babi'a dižə'an ca', chacda' chele, na' zoa' segor bito gonle can' bagwnia' chso'on beṇə' ca'. Nezda' gonšgacze can' cheyalə' goncho laogüe de'en babebej Diozən' chio'o xni'a de'e malən'. 10 Diozən' naque' beṇə' güen. Na' bito ganlaže'e can' babenle xšine'enə', na' can' ne'e chonczlen ṇa'a chaclenle yeziquə'achlə beṇə bagwleje' par zjənaque' lažə' ne'enə', chonlen laogüe de'en chaquele che'enə'. 11 Nezele žjəyezole len Cristən'. Na' de'e na'anə' yedote žlac cuiṇə' yide' de'e yoblə cheyalə' cue' yichjle de'en žjəyezole len le', can' bachi' yichjle ṇa'a par chaclen ljuežjle. 12 Bito gacle beṇə' godenag len xtižə' Diozən'. Legonlilažə' Diozən' can' bagwso'on beṇə' ca' bagwnitə', beṇə' ca' gosə'əzi' de'en ben Diozən' lyebe əgwnežjue' lega'aque'. La'anə'əczə cui gosə'əzi'en cate, con gwso'onlilažə'əteze'ene'.

13 Diozən' bene' lyebe de que xi'in dia che de'e Abraannə' əsa'aque' beṇə' zan. Na' de'en naque' Dioz na' notoch no no ṇla' beṇə' yoblə beṇə' napəch yelə' gwnabia' cle ca le', de'e na'anə' bzo cuine' testigw gwne': "Guaquəczə can' nia'anə' chedə' zoa' naca' Dioz." 14 Gwne': "De'e li goncza' par nič gaquə güen chio'. Na' de'e li goncza' par nič xi'in dia chio'onə' əsa'aque' beṇə' zan." 15 Na' sša gwzo de'e Abraannə' benlilažə'əteze' Diozən' xte que bžin ža goc can' ben Diozən' lyebe len le'. 16 Beṇəchən' chəsə'əzoe' jorament chəsə'əne' de que be'enə' chnabia'ach ca lega'aque' gwnežjue' castigw chega'aque' šə cui so'one' complir can' choso'ozoe' jorament. Chso'one' ca' par nič beṇə' ca' chsa'acyožə' lega'aque' se'ejle'e chega'aque' na'

yesyə'əyacxenlāže'e. ¹⁷ Beṇə' ca' chon Diozən' cuent zjənaque' xi'in dia che de'e Abraannə' laogüe de'en chso'onlilaže'e Diozən', Diozən' bene' par niç nitə'əchgüe' segor de que gwaquəczə can' bene' lyebe, na' bito chše'e can' bansi'e xṇeze gone'. De'e na'anə' bzo cuine' testigw gwne': "Gwaquəczən chedə' zoa' naca' Dioz." ¹⁸ Ca naquə Diozən' bene' lyebe na' leczə bzo cuine' testigw gwne': "Gwaquəczə can' nia'anə' chedə' zoa' naca' Dioz", bene' ca' par niç ṇezecho de que caguə de'e te can' gwne'enə'. Na' bito chac güe'e dižə' güenlāžə'. Diozən' bene' lyebe na' bzo cuine' testigw par niç bito žebcho sino yebeicho de'en ṇezecho žjəyezochō len le', chio'o bagwṇabechone' bezi'ixene' xtolə'əchon'. ¹⁹ Na' de'en ṇezecho žjəyezochō len Diozən' bito chac chop lažə'əcho sino zotezə zochō chonlilažə'əchone' chedə' la' ṇezecho de que Jeso'osən' chṇe' fabor chio'o lao Diozən' ca bṇoz əblao checho. ²⁰ Jeso'osən' bazjəyezoe' gan' zo Diozən' na' chone' par niç leczə chio'o žjəyezochō len le'. Na' Jeso'osən' naque' bṇoz əblao checho, ben' gwxaquə'əlebe ca bṇoz Melquisedequən'.

7

Jeso'osən' naque' ca bṇoz Melquisedequən'

¹ Na' Melquisedequən' goque' rei gan' nzi Salem na' Diozən' ben' naquə le'ezelaogüe beṇə' blao gwleje' le' par goque' bṇoz. Na' catə' beza' de'e Abraannə' beyož bene' gan lao rei ca' beṇə' ca' gosə'ədiləlen beṇə' Sodoma ca', bṇoz Melquisedequən' jəšague' le' na' len yelə' guac che Diozən' bene' par niç goc de'e šao' de'e güen

che de'e Abraannə'. ² Na' de'e Abraannə' botobe' de'e ca' gosə'əban rei ca' che beṇə' Sodomā ca' na' bnite'en ši cuen de'e naquə lebe nach gwleje' tcuenən par bnežjue'en bχoz Melquisedequən'. Melquisedequən' zeje dižə' "rei beṇə' chnabia' güen". Na' gwnabi'e gan' nzi' Salem, na' Salemən' zeje dižə' "gwnitə' beṇə' binlo". ³ Bitō nyojən šə no goquə de'e xaxna' Melquisedequən' na' niq̄ue nyojən šə no goquə de'e xaxta'ogüe'e, na' nic nyojən batə'əquə' golje' na' batə'əquə' gote'. De'e na'anə' nezecho cuiṇə' te yelə' naquə bχoz che'enə' na' leczə de'e na'anə' gwxaquə'əlebene' ca Xi'in Diozən'.

⁴ Le'e gon xbab de que bχoz Melquisedequən' goque' beṇə' blao. De'e na'anə' de'e xaxta'ocho Abraannə' lao ši cuen güejə de'e ca' gwleje', bnežjue' tcuenən bχoz Melquisedequən'. ⁵ Na' beṇə' ca' gwsa'aljə lao dia che de'e Lebin', beṇə' ca' besyə'əyalə' par gwsa'aque' bχoz, nyojən le'e lei de'en bzoj de'e Moisezən' de que yesə'əzi'e tcuen lao ši cuen yoguə' cuantzə de'e gotə' che beṇə' Izrael ca' yelə' la'anə'əczə yoguə'əlolga'aque' zjənaque' xi'in dia che de'e Abraannə'. ⁶ Melquisedequən' bito əṇacho golje' lao dia che de'e Lebin', pero gwxi'e tcuen lao ši cuen de'en botobə de'e Abraannə' na' len yelə' guac che Diozən' bene' par niçh goc güen che de'e Abraannə' ben' ben Diozən' lyebe əsa'ac xi'in dia che'enə' beṇə' zan. ⁷ Na' nacbia' de que Melquisedequən' zaquə'əche' cle ca de'e Abraannə' chedə' Melquisedec na'anə' gwdape' yelə' guac che Diozən' na' bene' par niçh goc de'e güen che de'e Abraannə'. ⁸ Na' beṇə' ca' gwsa'ac bχoz segon can' na lei de'en bzoj de'e Moisezən' gosə'əzi'e tcuen lao

ši cuen cuantzə bi de'en gotə' che beṇə' Izrael ca' yela'. Bxoz ca' gwsa'aque' beṇach na' gwsa'ate'. Pero Melquisedequən' ben' gwxi' tcuen lao ši cuen de'en botobə de'e Abraannə', cho'en dižə' che' ca beṇə' ne'e zoczə. ⁹⁻¹⁰ Na' ca naquə de'e Abraannə' bnežjue' Melquisedequən' tcuen lao ši cuen de'e ca' botobe' de'en gosə'əban rei ca', de'en na'anə' guaquə əṇacho de que de'e Lebin' lecə bnežjue' Melquisedequən' tcuen güejə lao ši cuen de'e ca' botobə de'e Abraannə'. Guac əṇacho ca' chedə' de'e Lebin' golje' lao dia che de'e Abraannə' la'anə'əczə bitonə' galje' catə'ən Melquisedequən' jəšague' de'e Abraannə'. De'e Lebin' goque' xa beṇə' nech ca' əgwsa'ac bxoz che beṇə' Izrael gwlaž checho ca' cana', na' lei de'en bzoj de'e Moizezən' nan de que yesə'əzi'e tcuen lao ši cuen cuantzə bi de'en de che beṇə' Izrael ca' yela'.

¹¹ Žalə' bxoz ca' beṇə' ca' gwsa'aljə lao dia che de'e Lebin' goc so'one' par ničh yichjla'aždao' beṇə' gwlaž checho ca' əsa'acquən can' chene'e Diozən', bito byažjecho yeto bxoz žalə' ca'. Pero de'en cui goquə so'one' par ničh əsa'ac yichjla'aždao' beṇə' can' chene'e Diozən', de'e na'anə' bidə Jeso'osən' par naque' bxoz chechon' na' gwxaquə'əlebene' ca Melquisedequən'. ¹² Jeso'osən' naquəcze' bxoz chechon' la'anə'əczə cui naque' dia che de'e Lebin'. De'e na'anə' nezecho banža' lei de'en choe' dižə' che bxoz che nasyon Izrael chechon'. ¹³ Bxoz checho ben' cho'echo dižə' chei, golje' lao dia che de'e Jodan', na' bitoch bchoj no gaque bxoz entr beṇə' ca' əgwsa'aljəch lao dia che de'e Jodan'. ¹⁴ Nezczecho de que Xanchon' golje' lao dia che de'e Jodan', pero de'en bzoj de'e Moizezən' le'e lein' nan de que beṇə'

ca' gwsa'aljə lao dia che de'e Lebin' əsa'aque' bχoz.

¹⁵⁻¹⁶ Bχoz checho Jeso'osən' naque' ca bχoz Melquisedequən'. Bito golje' lao dia che de'e Lebin' na' bito naque' bχoz can' na lei de'en bzoj de'e Moizezən'. Naque' bχoz chedə' bito gwzoi yelə' gotən' le', na' zocze' zejlicane. ¹⁷ Na' de'e nga nyojən can' gož Diozən' Jeso'osən' nan:

Naco' bχoz beṇə' zo zejlicane

na' naco' ca bχoz Melquisedequən'.

¹⁸ Ca naquə bχoz ca' beṇə' ca' ben Diozən' mendad gwnitə' cana', bitoch none' mendad nite'e na'a chedə' de'en gwso'one'enə' bito zaquəən par əsa'ac yichjla'aždao' beṇachən' can' chene'e Diozən', na' bito nsa'an yelə' guac che Diozən'. ¹⁹ Leinə' bito zaquəən gonən par niç yichjla'aždao' beṇə' əsa'aquən can' chene'e Diozən'. Pero na'a bazo Jeso'osən' chone' par niç chac yichjla'ažda'ochon' can' chene'e Diozən'. Na' nezecho chaquəch güen checho cle ca che beṇə' ca' zjənombia' lein'. Jeso'osən' chone' par niç zocho binlo len Diozən'.

²⁰ Na' par niç nezecho de que Jeso'osən' naque' bχoz chechon', Diozən' bzo cuine' testigw gwne':

Naquəcze' bχozən' chedə' zoa' naca' Dioz.

²¹ Beṇə' ca' gwsa'aque' bχoz segon can' bzoj de'e Moizezən', Diozən' bito gože' lega'aque' can' gože' Jeso'osən'. Nyojən' can' gože'ene', nan:

Diozən' bzo cuine' testigw gwne':

“Naquəczo' bχozən' chedə' zoa' naca' Dioz.

Na' bito gwša'a can' ni'anə'.

Le' naco' bχoz ben' zo zejlicane.

Naco' ca Melquisedequən'.”

22 Nezecho de que Jeso'osən' bedəlo'ine' chio'o de que Diozən' choncze' con can' none' lyebe par gaqualene' chio'o. Na' de'en none' lyebe gone' na'a naquəchən güen cle ca de'en bene' lyebe gone' antslə. 23 Benə' ca' gwsa'aque' bχoz segon can' na lei de'en bzoj de'e Moisezən', gwsa'aque' benəch na' gwsa'ate', pero benitə'ateczə lgua'aga'aque'. De'e na'anə' gwsa'aque' benə' zan. 24 Pero Jeso'osən' zoe' zejlicane na' de'e na'anə' zejlicane naquəcze' bχoz chechon'. 25 Na' notə'atezə benə' chse'ene'ene' nite'e binlo len Diozən', Jeso'osən' nape' yelə' guac par chōcobe' yichjla'ažda'oga'aque'en con šə chso'onlilaže'ene'. Nape' yelə' guac par gone' ca' chedə' zocze' zejlicane chnabe' goclen lao Diozən' par yoguə' chio'o chonlilažə'əchone'.

26 Na' Jeso'os nan' naque' bχoz əblao chechon' na' zaque'e par gaqualene' chio'o chedə' chone' cayanə'ən chazlazə' Diozən'. Bito bi dolə' nape', na' bito bi de'e mal chone', na' nic chone' xbab mal. Zoe' gan' zo Diozən', chnabi'e txen len le'. 27 Bito bi xtole'e de na' de'e na'anə' bito cheyalə' gote' bia yixə' par yezi'ixen Diozən' xtole'enə' can' gwso'on benə' ca' gwsa'ac bχoz segon can' na lei de'en bzoj de'e Moisezən'. Yoguə' ža zgua'atec gwso'ote' bia yixə' par nič gosə'ənabe' bezi'ixen Diozən' xtolə'əga'aque'enə' na' techlə leczə gwso'ote' bia yixə' par gosə'ənabe' bezi'ixen Diozən' xtolə' benə' Izrael ca' yelə'. Šlinzə bnežjw cuin Jeso'osən' por ni checho catə'ən gwso'ot benə' le' le'e yag corozən' na' bitoch gate' yeto. 28 Benə' ca' gwsa'ac bχoz əblao segon can' na lei de'en bzoj de'e Moisezən' gwsa'aque' benə' güen de'e mal can' zjənaquə yez-

iquə'əchlə beṇə'. Zan iz bagoc bzoj de'e Moisezən' lei che Diozən' catə' Diozən' bzo cuine' tes-tigw de que sele'e Xi'ine'enə' par gaque' bḫoz əblao chechon' na' gwne': "Gaquəcze' bḫoz əblaon' chedə' zoa' naca' Dioz." Na' Xi'ine' na'anə' zocze' zejlicane, na' naquə yichjla'aždaogüe'enə' cayanə'an chene'e Diozən'.

8

Cristən' chone' par niçh chac de'e cobə de'en non Diozən' lyebe gone' par gaquəlene' chio'o

¹ Na'a ža zo bḫoz əblao chechon', na' chi'e yoban' chnabi'e txen len Diozən' ben' naquə le'ezelaogüe beṇə' blao. Lennə' naquən de'e žialaoch lao yoguə' de'en babe'echo dižə' chei. ²⁻³ Bḫoz əblao ca' beṇə' ca' gwso'ot bia yixə' lo'o yo'odao' de'en gwso'on de'e xaxta'o chio'o beṇə' Izrael jso'e xchenga'acquəbən' gan' nzi' "Latjə gan' zo Diozən'" par niçh Diozən' bezi'ixene' xtolə'əga'aque'enə' len che beṇə' ca' yela'. Na' de'en gwso'one'enə' naquən ca de'en chac yoban' gan' zo Diozən'. De'e na'anə' benən byen bnežjw cuin Jeso'osən' gwso'ot beṇə' le' par niçh naque' bḫoz əblao chechon' gan' zo Diozən', na' chone' par niçh Diozən' chezi'ixene' xtolə' chio'o chonlilažə'əchone'. ⁴ Na' bito naque' bḫoz žalə' ne'e zoe' lao yežlyon', chedə' banitə' bḫoz ca' beṇə' ca' chjsoa' bi de'en chjsoa' lao Diozən' segon can' na lein'. ⁵ Na' yoguə'əloj de'en chso'on bḫoz ca' beṇə' ca' chso'on can' na lein', naquən latə' laszə ca naquə de'en chac yoban'. Diozən' bene' mendad len de'e Moisezən' antslə ze'e so'on de'e xaxta'o chio'o beṇə' Izrael yo'o de'e lachə'anə' gan' gwso'o bḫoz ca' par gwso'elaogüe'e Diozən',

gože'ene': "Yoguə' de'en bagwnia' gonle, legonən cayanə'an blo'ida' le' catə'an gwzochō lao ya'anə'."

⁶ Pero na' de'en chon Cristən' zaquə'əchən cle ca de'en gwso'on bχoz ca' beṇə' ca' gwso'on can' na lein'. Na' lecə de'e cobə de'en chon Diozən' len chio'o naquəchən güen cle ca de'en bene' antslə, çhedə' de'e xench de'en non Diozən' lyebe gone' par gaquəlene' chio'o ṇa'a.

⁷ Žalə' de'en ben Diozən' par goclene' beṇə' Izrael gwlaž checho ca' de'e nech benən par niç gwsa'ac yichjla'ažda'oga'aque'enə' can' chene'ene', bito bsele'e Cristən' žalə' ca'. ⁸ Pero nacia' Diozən' bito bebeine' lega'aque', nachən' gwne':

Chona' lyebe gona' to de'e cobə par gaquəlena' le'e beṇə' Izrael catə' əžin ža, nada' Xanle Dioz ənia' ca'.

⁹ Nža'an beṇa' len de'e xaxta'ole ca' ca tyemp catə'an goquəlenga'aca'ane' par niç besyə'əchoje' Egipton'.

Lega'aque' bito gwso'one' can' gwso'one' lyebe len nada'.

De'e na'anə' nada' Xanle Dioz bitoch bengə'aca'ane' cas.

¹⁰ Quinga gona' par gaquəlena' le'e beṇə' Izrael catə'an əžin žan':

Nada' Dioz gona' par niç šo'o yichjle de'e ca' nona' mendad gonle,

na' gona' par niç yebeilen lo'o la'ažda'olen'.

Na' toza' nada' güe'ela'ole na' le'e gacle xi'ina'.

¹¹ Na' ni tole cui chyažjən əgwšed əgwlo'i ljuežjle par niç gombi'ale nada'

çhedə' cana' yoguə'əle gombi'ale nada',

le'e cuitec bi zaquə'əle na' len le'e nacle beṇə' blaō.

12 Cana'ach bitoch gona' xbab che de'e mal ca' de'en babenlenə' chedə' ca orən' babezi'ixena' xtolə'əlenə'.
 13 Na' ca naquən' be' Diozən' dižə' che de'e cobən' de'en gwne' gone' par gaquəlene' nasyon chechon', nezecho chde che de'en bene' mendad so'one' antslə chedə' banaquən de'e golə na' bitoch cheyalə' gonchon.

9

Yo'odao' de lachə' de'en gwso'on beṇə' Izrael ca gwxaquə'əleben ca gan' zo Diozən'

1 Cana'ate ben Diozən' mendad naclə so'on beṇə' Izrael gwlaž checho ca' par so'ela'ogüe'ene'. Na' leczə bene' mendad so'one' to yo'odao' par le'.
 2 Yo'oda'onə' goquən de lachə'. Na' lo'o cuart nechən' bosozoe' to candeler na' to mes gan' bosocue'e yetxtil de'en naquə par Diozən'. Na' cuart nechən' nzi'in "Latjə che Dioz". 3 Na' cuart əgwchopen' nzi'in "Latjə gan' zoczə Diozən'". Na' entr cuart ca' chopə gwze to lachə'. 4 Na' lo'o cuart əgwchopen' bosozoe' yeto mes de or gan' bosozeye' yal. Na' gosə'əyixjue' to caj na' bosoguzje' doxenən or. Na' lo'o caj na' bosozoe' to yesə' de or gan' bosozə'e yelə' guao de'en gwza' yoba de'en nzi' mana, na' leczə lo'o caj na' gosə'əgüe'e garrot che de'e Ronnə' de'en bexejə. Na' leczə na' bosozə'e yej ta'a ca' gan' byoj de'en ben Diozən' mendad so'one' par niçh gaquəlene' lega'aque'. 5 Na' lao tap che cajən' bosonite'e chopə lgua'a lsaquə' angl beṇə' gosə'əzi' querobines. Na' gan' zjəzecha querobines ca' chey che'eni'in, par niçh nacbia' de que Diozən' zoe' na'. Toe' gwzecha

šyichjən na' yetoe' yešyichjən. Na' lao tap che cajən' entr lega'aque' nzi'in "Latjə che yelə' cheyašə' cheži'ilažə' che Diozən". Pero bitoch che'enda' güe'echa' dižə' che to to de'e ca'.

⁶ Na' beyož banitə' quart ca' na' beyož bosonite'e yoguə' de'e ca' lo'inə', yoguə' ža ja'ac bχoz ca' lo'o quart nechən' gan' gwso'one' can' ben Diozən' mendad so'one' par əso'ela'ogüe'ene'.

⁷ Na' quart əgwchopen' tozə bχoz əblaon' goc gwyo'e ze tgüiz güejə. Na' catə'ən gwyo'enə' benən byen bexe'e chen che bia yixə' bže'en lao cajən par nič Diozən' bezi'ixene' xtolē'enə' na' bezi'ixente' xtolə' beṇə' ca' yelə'.

⁸ Na' de'en cui gotə' lsens šo'o nochlə beṇə' lo'o quartən', Spirit che Diozən' chzejni'in chio'o de que bito gaquə šo'ocho gan' zo Diozən' žalə' ne'e chone' mendad gaquə yoguə'əloł de'en gwso'one' lo'o yo'oda' de'en nsa' chopə quart.

⁹ Na' yo'oda'onə' len yoguə' de'e ca' gwso'on bχoz ca' lo'inə' chlo'in chio'o zocho na'a can' naquə yoban' gan' zo Diozən'. De'e zan de'en gwso'on de'e xaxta'ocho ca' gwso'ela'ogüe'e Diozən' lo'o yo'oda'onə' pero bito beyac yichjla'ažda'oga'aque'en can' chene'e Diozən' la'aṇə'əczə bosonežjue' Diozən' bi de'en bosonežjue'ene' na' la'aṇə'əczə gwso'ote' bia yixə' par gwso'elaogüe'ene'.

¹⁰ De'e ca' bosonežjue' Diozən' gwsa'aquən no nis yelə' guao na' no bia yixə'. Na' de'e zan costombr chega'aque' gotə' par gwsa'a gosə'əyib cuinga'aque'. Na' yoguə' de'e ca' gwso'one' nič cuerp chega'aque'enə' goquən xi'ilažə' can' na lein'. Yoguə' de'e ca' gwso'one'enə' gwso'onən žin xte catə'ən bselə' Diozən' Cristən' par bene' de'e zaquə'əche.

11-12 Pero bazo Cristən' n̄a'a naque' b̄xoz əblao c̄hechon' na' chone' par niçh chac ḡüen can' gwnitə' de'e x̄axta'ocho ca' lez gaquə. Babeyepə' yoban' na' zoe' gan' zo Diozən'. Na' gan' zoe'enə' gwxaquə'əleben ca quart əgwchope c̄he yo'odao' c̄he beṇə' Izrael ca', pero naquəchən de'e zaquə'əche na' de'e ḡüench clezə ca de'en gwzo c̄he b̄xoz ca' cana', la' bito naquən de'e ben beṇəçh. Na' Cristən' zaque'e par gwyo'e gan' zo Diozən' c̄hedə' bnežjw cuine' gwso'ot beṇə' le' na' blalj x̄chene'enə' le'e yag corozən'. Bito n̄acho bete' no šib o no go'oṇ dao' na' blalje' x̄chembən' par niçh be'en Diozən'. Šlinzən' gwdixjue' xtolə'əchon' len x̄chene'enə' par zejlicane. ¹³ Ca naquə de'e x̄axta'ocho ca' bito gwsa'aque' xi'ilažə' can' na lein' šə bagosə'əgane' no beṇə' guat. Na' par niçh besyə'əyac cuerp c̄hega'aque'enə' xi'ilažə' de'e yoblə can' na lein', b̄xoz ca' boso'ože'e lega'aque' no x̄chen šib o no x̄chen go'oṇ na' len de de'en gwche' catə'n cheyož choso'ozeye' baquə' dao'. ¹⁴ Pero x̄chen Jesocristən' de'en bedəlaljə' par beque'e xtolə'əchon' zaquə'əchən ca x̄chen bia yixə' ca'. Xtolə'əcho na'anə' benən par niçh goccho ca beṇə' guat len yichjla'ažda'ochon', pero n̄a'a baben Jesocristən' par niçh naquə yichjla'ažda'ochon' xi'ilažə' niçh cho'ela'ocho Diozən' ben' zo zejlicane. Spirit c̄he Dioz nan' goclenən Jeso'osən' par ben cuine' lažə' na' Diozən' par gwdixjue' xtolə'əchon'. Na' ca naquə Jeso'osən' bitoczə bi bi xtolə'enə' gotə'.

¹⁵ Na' de'en bedəlalj x̄chen Cristən' gwzolao chac de'e cobən' de'en chon Diozən' lyebe gone' par chaclene' chio'o. Na' bachac de'e cobən' par niçh ca'

balteza beṇə' bagwlej Diozən' žjəsyə'ənite'e len le' zejlicane. De'en bedəlalj xchen Cristən' gwdixjue' lente de'e mal ca' bencho žlac ne'e chac de'e neche de'en ben Diozən' lyebe gone' par goclene' de'e xaxtao' chio'o beṇə' Izrael. ¹⁶ Catə' to beṇə' babene' testament, bito gaquə can' na testamentən' xte catə'əch nezecho de que bagote'. ¹⁷ Na' ca naquə testamentən' bito gaquə can' nannə' žlac ne'e mban be'enə' ben len. Catə' bagote' cana'anə' gaquə can' nannə'. ¹⁸ Na' par nič gwzolaogoc de'e neche de'en ben Diozən' lyebe gone' par goclene' de'e xaxta'ocho ca', bene' mendad boso'olalje' xchen bia yixə'. ¹⁹ De'e na'anə' catə' de'e Moizezən' beyož be'elene' beṇə' ca' dižə' che yoguə'əloj de'en ben Diozən' mendad so'one' can' na lei che'enə', nach de'e Moizezən' bže'e lega'aque' xchen go'on dao' na' xchen šib nach nis. Bže'e lega'aque' de'e ca' len latə' yišə' xa xilə' de'en mben color əxna na' len to xis yixə' dao' de'en naquə ca gwreg. Na' lecza bže'en librən' gan' nyoj leinə'. ²⁰ Na' de'e Moizezən' gože' lega'aque': "Chen ni ben Diozən' mendad əgwža'a le'e par nič gone' can' none' lyebe gone' par gaquəlene' chio'o." ²¹ Nach bža'ate'en yo'odao' de lachə'ən na' len yesə' ca' na' ša' ca' de'en boso'ochine' gan' gwso'ela'ogüe'e Diozən'. ²² Lei de'en bzoj de'e Moizezən' benən mendad boso'ože'e chennə' par nič zan de'en boso'ochine' gwsa'aquən xi'ilažə' can' na lein'. Diozən' bito bezi'ixene' xtolə' beṇə' žalə' cui boso'olalje' chen che bia yixə'.

De'en bnežjw cuin Cristən' gwso'ote'ene' chac cheque'e xtolə' chio'o chonlilažə'əchone'

²³ De'e na'anə' benən byen boso'ože'e xchen
 bia yixə'ən de'e ca' besə'əchine' lo'o yo'oda'onə'
 par nič gwsa'aquən xi'ilažə' can' na lein'. Pero
 xchen bia yixə' ca' bito gaquə gonən ca gaquə
 yichjla'ažda'ochon' can' chene'e Diozən' par nič
 šo'ocho gan' zoe'enə'. Tozə xchen Jesocrist nan'
 zaquə'ən par chonən ca chac yichjla'ažda'ochon'
 can' chene'e Diozən'. ²⁴ Catə' Cristən' gwdixjue'
 xtolə'əchon' bito gwyo'e lo'o cuart əgwchope
 che yo'oda'onə' can' gwso'on bχoz ca' cana' sino
 beyepe' yoban' gan' zo Diozən', na' na' zoczə' n̄a'a
 chne' fabor chio'o lao Diozən'. Na' cuart əgwchope
 che yo'odao' che beṇə' Izrael na'anə' gwzon par
 bzejni'in chio'o can' naquə gan' zo Diozən'. ²⁵ Bχoz
 əblao ca' ze tğüiz güejə gwso'e lo'o yo'oda'onə' gan'
 nzi' latjə gan' zoczə Diozən' boso'ože'e chen che
 bia yixə'. Pero Cristən' bito byažjən əgwnežjo
 cuine' so'ote'ene' zan las. Šlinzən' blalj xchene'enə'
 par gwdixjue' xtolə'əchon'. ²⁶ Žalə' byažjən laljə
 xchene'en zan las, babnežjw cuine' zan las dezd
 catə'ən gwxe yežlyon' žalə' ca'. Pero caguə ca'anə'.
 Bnežjw cuine' šlinzə catə'ən bžin or che'enə',
 na' de'en gwso'ote'ene' šlinzə cana', gwdixjue'
 xtolə'əchon' zejlicane. ²⁷ Na' Diozən' bansi'e xneze
 de que əžin ža sa'at to to beṇačən' na' šlinzən'
 sa'ate'. Na' techlə əṇa Diozən' che to toga'aque'
 šə yesə'əzi'e castigw o šə nite'e mbalaz len le'.
²⁸ Na' ca de'en sa'at beṇačən' šlinzə leczə šlinzən'
 bnežjw cuin Cristən' gwso'ote'ene' gwdixjue' xtolə'
 beṇačən'. Nach əžin ža yide' de'e yoblə, caguə par
 chixjoche' xtolə'əchon' sino par nič deyexi'e beṇə'
 ca' chəsə'əbezə batə'əquən' yide'enə'.

10

¹ Lei de'en bzoj de'e Moizezən' chzejni'in chio'o latə'əlaszə che de'e güen de'en gaquə checho catə' yežincho yoban' gan' zo Diozən'. Pero leinə' bito goquə gonən par ničh yičhja'aždao' beṇə' ca' gwso'on can' nannə' əsa'acquən can' chene'e Diozən', la'aṇə'əczə gwso'ote' bia yixə' yoguə' iz par bezi'ixen Diozən' xtolə'əga'aque'enə'. ² Žalə' de'en gwso'ote' bia ca' benən par ničh cuich so'one' de'e malən' bitoch besə'əyažjene' so'otəche'eb žalə' ca'. Pero de'en gwsa'acbe'ine' ne'e chso'one' de'e malən' nachən' yoguə' iz gwso'ote'eb. ³ Na' de'en gwso'one' ca' bito gwsa'anlaže'e de que zjənapə' dolə'. ⁴ Na' gwso'one' ca' yoguə' iz chedə' chen che no go'on dao' o no šib bito zaquə'ən par yeca'an xtolə' beṇə'.

⁵ De'e na'anə' catə' Cristən' bide' yežlyo nga gože' Xe' Diozən':
 Nezdə' to de'en chazlažə'əcho' mazəchlə ca bia yixə'
 bian' chso'ot beṇə' par chso'ela'ogüe'e le',
 na' mazəchlə ca bichlə de'en chso'one' le'.
 De'en chazlažo'onə' əgwnežjo cuina' par chixjua'
 xtolə' beṇə'chən'.

⁶ Lennə' de'en chebeido' mazəchlə ca bian' chso'ote'
 par choso'ozeye',
 na' mazəchlə ca xchen bia yixə' de'en
 chəsə'əlalje' catə' chəsə'əṇabe' yezi'ixeno'
 xtolə'əga'aque'enə'.

⁷ De'e na'anə' goža' le' can' nyojən le'e librən' gan'
 nan:
 “Dioz chia', za'a nga zedəyena' con can' cha-
 zlažo'onə'.”

⁸ Zgua'atec Cristən' gože' Xe' Diozən': “Nezdə' de'en
 chazlažə'əcho' na' de'en chebeichdo' ca de'en

chso'ote' bia yixə' na' ca bichlə de'en chso'one' le', na' ca de'en choso'ozeye' bia ca' chso'ote' na' lecza ca de'en chəsə'əlaljə' xchenga'acobən' par chəsə'əṇabe' chezi'ixeno' xtolə'əga'aque'enə'." Gwne' ca' la'aṇə'əczə lei de'en bzoj de'e Moisezən' benən mendad gwso'ote' bia yixə' na' gwso'one' bichlə de'e ca' gwso'one'enə'. ⁹ Nach Cristən' gože' Diozən': "Nada' za'a zedəyena' con can' chazlažə'onə'." De'e na'anə' nezecho de que Diozən' bitoch chene'ene' gotcho bia yixə' can' na' lein' chedə' Cristən' bagwdixjue' xtolə'əchon'. ¹⁰ Cristən' bene' con can' gwyazlažə' Diozən'. Šlinzən' bnežjw cuine' gwso'ot beṇə' le' par beyone' yichjla'aždao' yoguə' chio'o chonlilažə'əchone' xi'ilažə'.

¹¹ Beṇə' ca' zjanaquə bxož, yoguə' ža nitə'atezə nite'e chso'ote' bia yixə' par xtolə' beṇə' Izrael ca' yela', len la' xchen bia yixə'ən bito gaquə yeca'an xtolə' beṇə'. ¹² Pero na' Cristən' bnežjw cuine' šlinzə par gwdixjue' xtolə'əchon'. Na' beyožən' zjəyechi'e gan' chnabi'e len Diozən'.

¹³ Na' zoe' na' chbeze' əžin ža nitə' yoguə' de'e ca' chso'on contr le' na' beṇə' contr che' ca' xni'enə'.

¹⁴ Na' de'en gwdixjw Cristən' xtolə'əchon' šlinzə cana', na' beyone' yichjla'aždao' yoguə' chio'o chonlilažə'əchone' xi'ilažə', lecza babene' par ničh chac yichjla'ažda'ochon' can' chene'e Diozən' gaquən zejlicane. ¹⁵ Na' caguə nadə'əza' cho'a dižə' che de'e ca'. Lecza Spirit che Diozən' benən ca byojən ca' par ničh nezecho naquən de'e li, nan:

¹⁶ Quinga nona' lyebe gona' len lega'aque' catə' əžin žan':
Nada' Dioz gona' par ničh šo'o yichjga'aque' de'e ca' nona' mendad so'one',

na' gona' par niĉh yesyə'əbeine'en lo'o
la'ažda'oga'aque'enə'.

17 Nach nyoj yeto de'en nan:

Cuatəch žjsa'alaža'a ĉhe de'e mal ca' bagwso'one'
na' ĉhe xtolə'əga'aque'enə'.

18 Na' catə' babezi'ixen Diozən' xtolə'əchon',
bitoch chyažjecho gotcho bia yixə' par ənabcho
yezi'ixene'en.

*Cheyalə' socho güe'ela'ocho Diozən' na' goncho
orasyon laogüe'enə'*

19 Na'a ža benə' bišə', laogüe de'e blalj Jesocristən'
xĉhene'enə' par gwdixjue' xtolə'əchon' guaquəczə
šo'ocho gan' zo Diozən' sin cui žebcho. 20 De'en
ben Jesocristən' par niĉh šo'ocho gan' zo Diozən'
naquən to de'e cobə la' antslə "Latjə gan' zo
Diozən'" lo'o yo'oda'onə' bgašə'an len to lachə'.
Pero na'a de'en bnežjw cuin Jesocristən' por ni
ĉhechon' bito bi de de'en ĉcuašə'an latjə gan'
zo Diozən' yoban' len chio'o chonlilažə'əcho Je-
socristən'. 21-22 Na' de'en naquə Jesocristən' bĉoz
əblao ĉhecho, na' de'en chaclene' chio'o naccho
ca family ĉhe Diozən', de'e na'anə' cheyalə' socho
güe'ela'ocho Diozən' na' goncho orasyon laogüe'enə'
do yichj do lažə'əcho, gonlilažə'əchone' sin cui
gaquəžejlažə'əcho. Goncho ca' laogüe de'en blalj
xĉhen Jesocristən' par beque'e xtolə'əchon'. Na'
lecə bagwchoacho nisən'. 23 Na' can' gwzola-
cho chonlilažə'əcho Jesocristən', ca'aczən' cheyalə'
sotezə socho gonlilažə'əchone' na' yebeicho de'en
žjəyecho len le', ĉhedə' la' Diozən' ben' ben lyebe
žjəyecho len le', chone' complir can' ne'enə'.
24 Na' lecə cheyalə' güe'e ljuežjcho balor par niĉh

gaquæchecho che ljuežjcho na' gonchcho de'e güen to yetocho. ²⁵ Na' bito cuejyichjcho de'en chdopcho txen par cho'ela'ocho Diozæn', can' chso'on balə beṇə' chəsə'əbejyichje'en. Cheyalə' gwtiplažə' ljuežjcho par niç sochcho cheçh gonlilažə'əcho Cristæn'. Gonchcho ca' çhedə' bazon baozə yidə Cristæn' yeto.

²⁶ Na' šə chio'o cuejyichjcho dižə' li che Diozæn' de'en banombi'acho par gontezcho de'e malən', bitoch gaquəlenən chio'o de'en blalj xçhen Jesocristæn' par beque'e xtolə'əchon'. ²⁷ Na' šə goncho ca', cheyalə' žebcho castigw de'en gon Diozæn' chio'o, çhedə' notə'ətezcho choncho contr le' əsele'e chio'o lo'o yi' gan' cuiayi'icho. ²⁸ Ca naquə beṇə' ca' chsa'aque'ne' bitobi zaquə' lei de'en bzoj de'e Moisezæn' na' bito choso'ozenague' çhei, beṇə' gwlaž çhecho ca' chso'ote' lega'aque' sin cui chesyə'əyaše'ene' lega'aque', con šə nitə' çhopə o šonə testigw beṇə' chso'e dižə' de que de'e malən' bagwso'one'. ²⁹ Pero chio'o ža šə gue'icho Xi'in Diozæn' na' Spirit çhe'enə' de'en nži'ilažə' chio'o, zaquə'əczæn par si'icho castigw gualəç, na' le'egatezə ca' šə gaquecho cui bi zaquə' xçhene'enə'. Lennə' bedəlalje' par niç gwzolaç de'e cobə de'en ben Diozæn' lyebe gone' par chaçlene' chio'o na' bedəlalje'en par niç yichjla'aždao' chio'o chonlilažə'əchone' beyaquən xi'ilažə'. ³⁰ Nezecho de que Diozæn' gwne': "Nadan' co'olažə'a beṇə' ca' chso'on contr nada' na' nadan' gonga'aca'ane' castigw." Na' leczə nyojən nan: "Diozæn' gwnežjue' castigw çhe beṇə' ca' bagwcue'e ca' xi'ine' šə so'one' de'e malən'." ³¹ Na' šə cuejyichjcho Diozæn' ben' zo zejlicane, leçgualə de'e

žebcho ca naquə castigon' de'en goṇe' chio'o.

³² Le'e žjsa'alažə' can' bchejele la'anə'əczə de'e zan de'e gwdi' gwxaquə'əle ca tyempən' catə'an ze'e gwzolao gwyejni'ile che Cristən'. ³³ Besyə'əbei beṇə' contr chele ca' bosə'ogüie' can' bžaglaole catə'an bosə'ožia bosə'onite'e le'e na' catə'an gosə'əque'e de'en gotə' chelen'. Na' lecəə bchejele par benle txen len beṇə' ljuežjcho ca' catə'an goc čega'aque' ca'. ³⁴ Beyašə' beži'ilažə'əle ljuežjcho ca' beṇə' ca' gwsa'atə' ližya na' gwzole mbalaz la'anə'əczə gosə'əca' beṇə' de'en gotə' čele, čedə' la' gwṇezele de que laogüe de'en chonlilažə'əle Cristən' de de'e zaquə'əche čele yoban' de'e cui te čei. ³⁵ Na'a ža, bito cuejyichje ca de'en chonlilažə'əlene', čedə' gwžin ža catə' sole mbalaz. ³⁶ Bito žjxaquə'əlažə'əle par yeyož gonle yoguə'əloḷ can' chene'e Diozən' la' šə gonle can' chene'ene'enə' žjəyezole len le' zejlicane can' bene' lyebe. ³⁷ Nyojən can' gwna Diozən' nan:

Lechgualə lgüegwzə əžin ža catə' yidə ben' əselə'a, na' bito šeichene'.

³⁸ Na' beṇə' ca' zjanaque' beṇə' güen laogua'anə' cheyalə' nite'e so'onlilaže'e nada'.

Na' beṇə' ca' chesyə'əbižə' cuich chso'onlilaže'e nada', bitoczə yebeiga'acda'ane'.

³⁹ Pero na' chio'o ža, bito nacho naccho ca beṇə' ca' chesyə'əbižə' cuich chso'onlilaže'e Diozən', beṇə' ca' yesə'əbiayi'. Chio'o zotezə zocho chonlilažə'əchone' na' de'e na'anə' nezecho žjəyezochə len le' zejlicane.

11

Diozən' chebeine' beṇə' laogüe de'en

chso'onlilaže'ene'

¹ De'en chonlilažə'əcho Diozən' nezecho gvaquə de'en chbezcho gaquə, na' nezecho de'e liczə can' na Diozən' che de'e ca' cui chle'icho. ² Na' beṇə' ca' gwnitə' gwłalte, bebei Diozən' lega'aque' laogüe de'en gwso'onlilaže'ene'.

³ Na' de'en chonlilažə'əchone' chejni'icho de que con bene' mendad goc yoban' na' yežlyon'. Bito bi bchine' par bene'en.

⁴ Na' ca naquə de'e Abelən', de'en benlilaže'e Diozən', goque beṇə' güen lao Diozən' na' bebei Diozən' de'en bnežjw de'e Abelən' le' cle ca de'en bnežjw de'e Cainṇə'. Na' la'aṇə'əczə cuich zo de'e Abelən', de'en benlilaže'e Diozən' chzejni'in chio'o de que can' cheyalə' goncho.

⁵ Na' Enoquən' leczə benlilaže'e Diozən', na' de'e na'anə' Diozən' bezi' beque'ene' sin cui gote'. No-toch no ble'i le'. Na' nyojən che' de que chebei Diozən' le' antslə ze'e yezi' yeque'ene'. ⁶ Diozən' bito chebeine' notə'ətezə beṇə' cui chonlilažə' le'. Na' šə no güe'elao' le', cheyalə' šejle'e de que zoczə Diozən' na' de que gwzenagczə Diozən' che' šə bi de'en əṇabene' le' do yichj do laže'e.

⁷ Na' ca naquə de'e Noen' ža, leczə benlilaže'e Diozən'. Na' Diozən' bosnisene' le' can' ze'e gaquə na' de'e Noen' gwyejle'e che'. De'e na'anə' Noen' bene' to barcw gan' gwyo'e len family che' ca' par nich bito gwsa'ate' len nisən'. Na' yelə' chonlilažə' che'enə' len Diozən' blo'in beṇə' ca' yez-iquə'əchlə gwža' yežlyon' de que gwsa'ape' dolə'. Na' leczə de'en benlilaže'e Diozən', de'e na'anə' Diozən' gwne' che' de que naque' beṇə' güen laogüe'enə'.

8 Na' de'en benlilažə' de'e Abraannə' Diozən', bzenague' catə' Diozən' bene' mendad šeje' zitə'. Na' gan' gwyeje' Diozən' blo'ine' le' yežlyon' de'en gaquə che'. Na' gwyeje' la'anə'əczə bito nombi'e latjən' ca orən'. 9 Na' de'en benlilažə' de'e Abraannə' Diozən', gwzoe' laž beṇə' zitə' gan' ben Diozən' lyebe gwnežjue' xi'in dia che' ca'. Na' de'e Abraannə' gwzoe' lo'o yo'o de lachə'əzə, na' leczə lo'o yo'o de lachə'əzə gosə'anitə' de'e xi'ine' Isaaquən' na' de'e xi'in xesoe' Jacobən', beṇə' ca' leczə gosə'əbeze' gwnežjo Diozən' xi'in dia čhega'aque' ca' yežlyon'. 10 Bito bi goque de'e Abraannə' de'en gwnite'e lo'o yo'o de lachə'əzə, čhedə' gwzoe' lez əžin ža soe' gan' zo Diozən', gan' naquə to syoda güen de'e cui te čhei, syoda de'en ben Diozən'.

11 Na' ca naquə de'e Sar no'ol che de'e Abraannə', benlilaže'e Diozən' na' de'e na'anə' Diozən' bene' par nič bi'e bdao' na' gwxane'əbo' la'anə'əczə cuich zoe' xlaogüe'e sane'. Diozən' bene' ca' len de'e Sarən' čhedə' Sarən' gwyejle'e de que Diozən' gone' can' bene' lyebe. 12 De'e na'anə' la'anə'əczə de'e Abraannə' naque' beṇə' golə par so xi'ine', xi'in dia che' ca' gwsa'aque' beṇə' zan can' zjənaquə beljw ca' de'en zjəžia le'e yoban' na' can' naquə yox de'en chi' cho'a nisdə'onə', notono no gaquə gwlabə' xi'in dia čhe'enə'.

13 De'e Abraannə', de'e Isaaquən' na' de'e Jacobən', na' nochlə beṇə' ca', ne'e chso'onlilažə'əcze' Diozən' catə' bžin ža gwsa'ate' la'anə'əczə cuiṇə' gac can' ben Diozən' lyeben'. Bito gwsa'acžejlaže'e, sino que gwse'ejle'ecze' de que gwžin ža gone' can' gwne'enə'. Na' lega'aque'

gwsa'acbe'ine' de que zjənaque' ca beṇə' zitə' len beṇə' ža' lao yežlyon' na' de que bito bi lažga'aque' de lao yežlyo nga. ¹⁴ Na' de'en gwsa'aque' cui bi lažga'aque' de lao yežlyon', nachbia' de que gwse'enene' yesə'əžine' ga yoblə gan' gaquə lažga'aque'enə'. ¹⁵ Žalə' gwso'one' xbab che yežən' gan' gwsa'alje' de que naquən lažga'aque'enə', zjəsyə'anitə'alje' na' žalə' ca'. ¹⁶ Pero gwso'one' xbab de que yoban' naquən lažga'aque'enə' na' gwse'enchgüeine' yesyə'əžine' na', chedə' la' güench naquən clə ca yežlyon'. De'e na'anə' Diozən' bito cheto'ine' čhega'aque' par əṇe' de que naque' Dioz čhega'aque' ben' chso'elaogüe'e, na' le' babenšəogüe'e to syoda par lega'aque'.

¹⁷⁻¹⁸ Na' ca naquə de'e Abraannə' benlilaže'e Diozən', de'e na'anə' bzenague' catə' Diozən' benene' prueb gože'ene': "Bet xi'inə' Isaaquən' can' choto' bia yixə' ca' na' chlaljə' xčhenga'acquəbən' par cho'elaogo'o nada'." Na' gwṇeze de'e Abraannə' de que Diozən' bene' lyebe len le' de'e zan de'e güen de'e gaquə por xi'in dia che'enə'. Na' che bi'i nan' gož Diozən' de'e Abraannə': "Xi'in dia che Isaac na'azə gona' cuent lao dia čchio'onə'." Pero bia'aczə bzenag de'e Abraannə' ca de'en gož Diozən' le' got xi'ine' tlišə'anə'. Na' bžin orən', Diozən' bito be'e latjə gote'ebo'. ¹⁹ De'e Abraannə' bzenague' par gote'ebo' chedə' gwṇezene' de que Diozən' chac yosbane' beṇə' guat ca'. Na' ca naquə Diozən' bito be'e latjə gote' xi'ine'enə' guac əṇacho de que Diozən' bosbane'ebo' ladjə beṇə' guat ca'.

²⁰ Nach leczə de'e Isaaquən' benlilaže'e Diozən', na' de'e na'anə' gwṇabene' Diozən' gone' güen len

xi'ine' ca' de'e Jacobən' na' de'e Esa'on'. ²¹ Leczə de'e Jacobən' benlilaže'e Diozən', na' de'e na'anə' catə' bazon gate' gwṇabene' Diozən' gone' güen len xi'in xesoe' ca', xi'in de'e Jwsen'. Na' bchequə' yichje'enə' be'ela'ogüe'e Diozən' žiaša'atezə garrot che'enə'. ²² Na' de'e Jwsen' leczə benlilaže'e Diozən' na' gwyejle'e de que əžin ža yesyə'əchoj beṇə' Izrael ca' Egipton' can' ben Diozən' lyebe. De'e na'anə' catə' bazon gate' bene' mendad yesyə'əyo'e žit che cuerp che'enə' catə' žjəya'aque' Canaanə'.

²³ Na' catə' goljə de'e Moizezən', de'e tant gwso'onlilažə' de'e xaxne'e ca' Diozən', bito besə'əžebe' so'one' contr can' ben de'e rein' mendad so'one' ca' de'en gože' beṇə' Izrael ca' so'ot bi'i chega'aque' ca'. Šonə bio' bosocuaše'e de'e Moizezən' ližga'aque'enə', chedə' gwsa'aque' nacho' xochegua. Na' catə' bitoch goquə yoso'ocuaše'ebo', xi'in rein' beque'ebo' boscha'ogüe'ebo'. ²⁴ Na' catə' bagwcha'o de'e Moizezən', benlilaže'e Diozən' na' de'e na'anə' bito gone'ene' gaque' cuent ca' bi'i che de'e xi'in Rei Faraonə'. ²⁵ Gwyazlažə'əche' bžaglaogüe' txen len beṇə' Izrael ca' ca' de'en gosə'əzaquə'əzi' gosə'əzaquə'əyaše'e, cle ca' gone' bi' de'en chəsyə'əbei beṇə' mal ca' chso'one', la' de'e te chei de'e ca'. ²⁶ De'en bžagla' de'e Moizezən' gwxaquə'əleben ca' de'en gwxaquə'əzi' Cristən'. Na' gocbe'ine' de que de'e zaquə'əche əžaglaogüe' yoguə' de'e ca' cle ca' si'e doxen yelə' gwni'a che Egipton'. Gwṇezene' gwžin ža catə' gon Diozən' par nič soe' mbalaz. ²⁷ Na' de'en benlilaže'e Diozən' bito bžebe' rein' catə' bžin ža besyə'əchoje' Egipton' la'anə'əczə rein' bža'achgüe' lega'aque'. Na'

de'e Moizezən' gwlo'o gwčhejlaže'e len de'e ca' bžaglaogüe' lao bene' par besyə'choje' Egipton' čhedə' gwņezene' zoczə Diozən' len le' ca ņacho chle'iczene' le'. Lə'aŋə'əczə Diozən' cui no chac le'i le'.

²⁸ Na' de'e Moizezən' de'en benlilaže'e Diozən' bene' mendad len to to family beŋə' Izrael ca' gwso'ote' xilə' dao' ca'can' gož Diozən' le' na' bosoože'e xčhenga'acquəbən' ližga'aque'enə' par nič anglən' ben' bselə' Diozən' bito bete' bi'i nech ca' lao yoguə' family čhega'aque'enə'. ²⁹ Na' beŋə' Izrael ca' de'en gwso'onlilaže'e Diozən', Diozən' bene' par nič Nisdəo' Exnən' goquən čoplə xte bla' yo biž par nič goc gosə'ədie' yešlā'alə. Pero na' beŋə' Egipto ca' catə' gwsə'aclaže'e yesə'ədie', beyeyjw nisən' gan' čəsə'ədi'enə' na' gwsə'ate' gwse'eje' nisən'.

³⁰ Na' leczə de'en gwso'onlilažə' beŋə' Izrael ca' Diozən', de'e na'anə' Diozən' bene' par nič be-bixə ze'e de'en gwyečhj doxen syoda Jericon' catə' beŋə' Izrael ca' jəsə'əžechje'en yoguə' ža lao gažə ža. ³¹ Na' de'e Raabən' no'olən' goquə sargat antslə, leczə benlilaže'e Diozən'. Na' de'en benlilaže'ene' bito gwžiyaye'e len beŋə' Jerico ca' beŋə' ca' cui bosoozenag čhe Diozən', čhedə' le' ža bgüialaogüe' beŋə' Izrael ca' liže'enə' beŋə' ca' jəsə'əgüia jəsə'əye' laže'enə'.

³² ¿Bichxan' əŋia' ža? Bito nlatja' par gua'a dižə' čhe de'e Gedeonnə', čhe de'e Baraquən', čhe de'e Sansonnə', čhe de'e Jeften', čhe de'e Dabin', čhe de'e Samuelən' na' čhe yeziquə'əchlə beŋə' ca' gwsoe'xtižə' Diozən' cana'. ³³ Na' laogüe de'en gwso'onlilaže'e Diozən' bale' besə'əchoje'

gws'o'one' gan catə' gosə'ədilələne' no rei, na' yebalē' gws'o'one' byen par ničh beṇə' yoblə gws'o'one' de'en naquə de'e güen. Na' yebalē' ben Diozən' lyebe gone' to de'e gone' len lega'aque' na' goc can' bene' lyeben', nach leczə yebalē' Diozən' bene' par ničh bež əznia ca' cui bi gws'o'one'eb lega'aque'. ³⁴ Na' leczə de'en gws'o'onlilaž'e Diozən', balē' bito gwse'eye' lo'o yi'inə, na' yebalē' besyə'ala catə' gwse'ene'e beṇə' so'ote' lega'aque' len spadən', na' yebalē' bnežjw Diozən' lega'aque' fuers balor catə' cui bi fuers čhega'aque' gotə', na' yebalē' gwsa'aque' soldad gual, na' yebalē' gws'o'one' gan soldad zitə' beṇə' besə'əžin gosə'ədilələne' lega'aque'. ³⁵ Gwnitə' no'olə gws'o'onlilažə' Diozən' na' laogüe de'en gws'o'onlilaž'e'ene'enə' bosbane' no family čhega'aque' ladjo beṇə' guat ca'.

Na' gwnitə' beṇə' gws'o'onlilažə' Diozən' na' bito gwse'enene' yesə'əbejyichje'ene' par yesyə'əchoje' lao de'en čəsə'əchi' čəsə'əsaquə' beṇə' lega'aque', čhedə' gwnite'e lez yolis yosban Diozən' lega'aque' ladjo beṇə' guat ca' par žjəsyə'anite'e len le'. ³⁶ Na' gwnitə' beṇə' lechgualē gosə'əzi'ichižə' beṇə' lega'aque' na' gws'o'ot gosə'əyine' lega'aque' na' boso'očeje' lega'aque' gden, na' gosə'əyixjue' lega'aque' ližya. ³⁷ Na' beṇə' mal ca' boso'ošiže'e balə beṇə' ca' chso'onlilažə' Diozən' yej, na' boso'ozoxje' cuerp čhe yebalē' len syer, na' gosə'əgo'oyele'e yebalē' par yesə'əbejyichje' Diozən', pero bito gosə'əbejyichje'ene', na' gws'o'ote' yebalē' len spad. Na' balə beṇə' ca' gws'o'onlilažə' Diozən' gwsa'aše' yixə' zjənyaze' no xa xilə' na' no xa šib. Bitobi bi gotə' čhega'aque'. Lechgualē nyašə' goc

chega'aque'. Na' lechgualē boso'o'chi' boso'osaquə' beṇə' lega'aque'. ³⁸ Gosə'əlaže'e do latjə dašən' na' do ya'adao' na' do ga ze bļoj na' ga zo no liž bia yixə'. Yoguə' de'e ca' goc che beṇə' ca' gwso'onlilažə' Diozən', len la' zjəzaquə'əche' lao Diozən' cle ca yoguə' beṇə' ca' cui gwso'onlilaže'ene'enə'. ³⁹ Na' la'aṇə'əczə bebei Diozən' yoguə' beṇə' ca' gwso'onlilažə' le', bito bene' ca gaquə yoguə'əlol de'e ca' bene' lyebe žlac gwnitə' lega'aque'. ⁴⁰ Diozən' bito gone'ene' gaquə che lega'acze' de'en bene' lyebe, sino bene' par nič txen len lega'aque' bagoc checho can' bene' lyebe gaquə par nič chac yichjla'ažda'ochon' can' chene'ene'enə', na' lechgualē mbalaz can' bene'enə'.

12

Cheyalə' sotezə socho goncho xbab che Jeso'osən'

¹ De'en gwso'on yoguə' beṇə' ca' gwso'onlilažə' Diozən' žlac gosə'əbane' yežlyo nga chzejni'in chio'o can' cheyalə' gonlilažə'əchone'. De'e nan' cheyalə' gwcui'ižəcho ca'alə šə bi de'en chžon par gonlilažə'əchcho Diozən', na' cuejyichjcho šə bi de'e mal de'en choncho. Na' cheyalə' co'o gwchejlažə'əcho len bitə'ətezə de'e chac checho par nič sotezə socho gonlilažə'əcho Diozən' na' goncho can' ne'enə'. ² Cheyalə' sotezə socho goncho xbab che Jeso'osən' chedə' tozə le' chonlilaže'e Diozən' cayanə'ən cheyalə' gonlilažə'əchone' chio'o. Gwneze Jeso'osən' ze'e gon Diozən' par nič soe' mbalaz len le', na' de'e na'anə' gwlo'o gwchejlaže'e de'en gwxaquə'əzi'e catə'ən gwso'ot beṇə' le' le'e yag corozən' na'

be'e latjə beya' gwso'one beṇə' ca' le'. Pero ṇa'a chi'ilene' Diozən' yoban' na' chəsə'anabi'e txen.

³ Cheyalə' goncho xbab che Jeso'osən' can' gwlo'o gwchejlaže'e len yoguə' de'en gwso'on beṇə' mal ca' contr le' par niç co'o gwchejlažə'əcho na' cui gaquecho zdebə goncho can' chene'e Diozən'. ⁴ Na' chio'o ža, de'e zan babžaglaochə chedə' choncho xte ga zelao chzaque'echo par cui choncho de'e malən', pero notononə' got chio'o. ⁵ Cheyalə' žjsa'alazə'əcho de que Diozən' chone' chio'o consejw can' chso'on beṇə' len xi'inga'aque'. Na' consejon' chone' chio'o nyojən nan:

Xi'indaogua'a, bito gaquele de que cui bi zejen ca de'en chona' castigw chelen' catə' chonle bi de'e malən',
na' bito gaquele tolə catə' chdila' le'e, nada' naca' Xanle.

⁶ De'e na'anə' nada' chnežjua' castigw che beṇə' ca' chacda' chei catə' chso'one' de'e malən',
na' chona' par niç chəsə'əžaglaə beṇə' ca' bagwcuə'a ca xi'ina' catə' cui choso'ozenague' chia'.

⁷ De'e nan' ža, Diozən' chone' chio'o castigw chedə' chosgole' chio'o can' chso'on beṇachən' chosyo'osgole' xi'inga'aque'enə' bi'i chsa'aque'ne' chei, chso'one' castigw chega'acbo' catə' chso'ombo' de'e malən'. ⁸ Na' šə cui bi castigw chechon' chon Diozən' catə' choncho de'e malən', zeje dižə' de que bito naccho xi'ine', la' yoguə' chio'o bagwcue'e ca xi'ine' catə' choncho de'e malən' chone' castigw checho. ⁹ Xaxna'acho ca' bosyo'osgole' chio'o yežlyo nga na' gwso'one' castigw checho che bi de'e mal de'en bencho

na' bzenagcho chega'aque'. Naquæchxe cheyalə' ægwzexjw yichjchon' gwzenagcho con bin' əna Xacho Diozən' ben' choŋ yelə' mban zejlicane che chio'o chonlilažə'əchone'. ¹⁰ Na' xaxna'acho ca' lao to chop izən' gwso'one' castigw checho con can' gwnan chega'aque'enə'. Pero na' Diozən' chone' chio'o castigw parzə niç gaquəlene' chio'o, par niç ca' gaccho beŋə' la'aždao' xi'ilažə' can' naque'enə'. ¹¹ Na' lao orən' bito chazlažə'əcho bitə'ətezə castigw de'en chaccho. Pero galj chdelə cheyache'icho naquən' goncho chedə' castigw de'en chaccho chaclenən chio'o par niç sotezə socho goncho de'e güennə'.

Diozən' gone' castigw checho šə cui gwzenagcho che'

¹² De'e na'anə' lesotezə lesə legonlilažə' Diozən' na' le'e co'o gwchejlažə' bitə'ətezə de'en chyi' de'en chzaquə'əle. ¹³ Lesə legon con can' chene'e Diozən'. Legonən par niç beŋə' ljuežjle ca' yoso'ozenaguəche' che Diozən' caguə ca yesə'əxope' so'onche' de'e malən', chedə' bale' cuiŋə' yoso'ozenague' che yoguə'əlol de'en chene'e Diozən' so'one'.

¹⁴ Legon ga zelao saque'ele par niç sole binlo len yoguə' beŋə' chso'onlilažə' Jesocristən'. Na' lecə legü'e latjə par niç Diozən' gone' la'ažda'olen' xi'ilažə', chedə' notono no yežin gan' zo Diozən' šə cui naquə la'ažda'ogü'e'en xi'ilažə'. ¹⁵ Bito güe'ele latjə par niç tole cuejyichjle cuich talenle Diozən', la' Diozən' nži'ilažə'əchgü'e' yoguə'əcho. Na' šə tole cuejyichjle Diozən', nxož yoguə'əle gonle ca'. ¹⁶ Bito co'o xtole o cuejyichjle be'en chele o no'ol chele par

solenle beṇə' yoblə. Na' bito gue'ile de'en naquə de'e zaque'e lao Dīozən'. Nezecho de'e Esa'on' por to yelə' guao na'azə bete'e de'en banaquən gwnežjo Dīozən' le' de'en golje' naque' beṇə' nech. ¹⁷ Nezele de que gwdechlə gone'ene' yeyac lao ne'e de'en bdie' lao na' beṇə' biše'enə', pero bito goquə bi gone' par ničh yeyaquən lao ne'enə' la'aṇə'əczə gwcheže' tant gone'ene' yeyaquən lao ne'enə'.

¹⁸ Nža'alə chac che chio'o ṇa'a cle ca can' goc che de'e xaxta'ocho ca' catə'ən Dīozən' bnežjue' lega'aque' lei che'enə'. Betje' lao ya'a Sinain' na' gwyečh̄j yi' bel̄ lao ya'anə', na' gwxoan žen, na' beyaquən žčhol, na' gwyečh̄jchgua be'.

¹⁹ Na' gwse'enene' gwchež to trompet, na' leczə gwse'enene' be' Dīozən' dižə' len lega'aque'. Pero de'e tant besə'əžebe' xte gwsa'atə'əyoine' de'e Moisezən' par ničh ye'e Dīozən' cuich güe'elene' lega'aque' dižə'. ²⁰ Lechgualə besə'əžebe' por ni che de'en gož Dīozən' lega'aque' antslə de que šə no beṇə' žjəbigue'e ya'anə' par yesə'əgüie' laogüen' yoso'ošiže'ene' yej, na' leczə ca' so'onene' šə bia yixə'. ²¹ Na' nezecho lechgualə de'e zaquə' žebchon' goquəczə lao ya'a Sinain', chedə' len de'e Moisezən' gwne': "Lechgualə chaž chžeba' can' chac."

²² Pero ṇa'a ža chio'o banaccho txen len Dīozən' ben' zo zejlicaṇe na' len yoguə' angl zan che' ca' beṇə' ca' že' yoban. Na' yoban' gwxaquə'əleben ca syoda Jerosalennə' na' ca ya'a Sionnə'. ²³ Na' naccho txen len yoguə'əlolte beṇə' yeziquə'əchlə beṇə' ca' leczə chəsə'ədopə chəsə'əžag chso'elaogüe'e Jesocristən', na' yoguə'əcho len lega'aque' gwxaquə'əlebecho ca to beṇə' goljə nech lao to family laogüe de'en naccho beṇə'

blao lao Diozən', na' yoguə'əcho nyoj lachon' le'e libr che Diozən' de'en de yoban'. Naccho txen len Diozən' ben' əchoglaogüe'en che yoguə'əlol beṇachən' šə zjənaque' beṇə' güen o šə zjənaque' beṇə' mal. Leczə naccho txen len beṇə' ca' bagwsa'at, beṇə' ca' gwso'onlilažə' Cristən' lao gwnite'e yežlyon'. Diozən' babene' par ničh yichjla'aždao' lega'aque'enə' banaquən' cayaṇə'an chene'ene' əsa'aquən. ²⁴ Na'a ža zocho txen len Jeso'osən' chedə' le'enə' bedəlalj xchene'enə' par ničh gwzolao chon Diozən' de'e cobə de'en none' lyēbe gone' par gaquəlene' chio'o. Na' xchen Jeso'osən' de'en bedəlalje' catə'an gwso'ote'ene' chlo'in de que Diozən' chezi'ixene' xtolə' con beṇə' chso'onlilažə' Jeso'osən'. Caguə can' naquən len xchen de'e Abelən' de'en gwłaljən', chedə' lenṇə' con blo'en de que de'e malən' ben beṇə' biše'enə' bete'ene'.

²⁵ Naquən de'e žialao xen gwzenagcho che xtižə' Diozən'. Nezecho de que bnežjue' castigw che de'e xaxta'ocho ca' catə'an gwsa'aque' godenag len xtiže'enə' de'en be' de'e Moisezən' len lega'aque'. Pero gonche' castigw che chio'o šə cui gwzenagcho che xtiže'enə' de'en bedəzejni'i Xi'ine' ben' zo yoban'. ²⁶ Lechgualə gwxo' catə' Diozən' betje' yoban' par bžine' lao ya'a Sinain' gan' be'elene' beṇə' Izrael ca' dižə'anə'. Na' gwdechlə gwne': "Gwžin ža catə' yossi'inša' yežlyon' de'e yoblə, pero caguə yežlyo na'azən' sino que lenczə de'e ca' chle'icho le'e yoban'." ²⁷ Na' de'en gwne' de que yossi'inse'en de'e yoblə, zejen de que cana'achən' te che yoguə' de'e ca' ben Diozən' de'en chle'icho, ca' naquə yežlyon' na' de'e ca' chle'icho

le'e yoban'. Na' catə' babesyə'anit yoguə' de'e ca' chle'ichon' Diozən' ne'e zocze' chone' par nič hac de'e güen de'e cui te chei. ²⁸ De'e na'anə' cheyalə' güe'echo yelə' choxcwlen che Diozən' ca de'en cui te che de'e mbalaz de'en hac lo'o yichjla'aždao' chio'o chonlilažə'əchone'. Na' leczə güe'etecho yelə' choxcwlen che' ca de'en cui te che de'en žjəyezochó len le' zejlicane. Cheyalə' gapcho Diozən' respet na' güe'ela'ochone' can' chazlažə'enə'. ²⁹ Nezecho ca naquə yi'inə' chzeyən bitə'ətezə, na' ca'aczən' chon Diozən', chone' castigw che bitə'ətezə de'e mal de'en chon chio'o benəch, chedə' lechgualē chgue'ine' bitə'ətezə de'e malən'.

13

De'en chazlažə' Diozən' goncho

¹ Cheyalə' sotezə socho gaquecho che yeziquə'əchlə beṇə' chso'onlilažə' Jesocristən', chedə' yogue'e zjənaquə bišə'əcho na' zanchó.

² Cheyalə' əggüialaocho beṇə' zitə' ližchon' na' gonga'acchone' goclen. Balə xaxta'ocho ca' catə' bosə'əgüialaogüe' beṇə' zitə' na' bosə'əgüialaogüe' angl che Diozən' sin cui gwsa'acbe'ine'.

³ Cheyalə' gaquəlencho beṇə' ljuežjcho ca' chsa'atə' ližya chedə' txennə' chžaglaolenga'acchone' šə bi de'e chac chega'aque'. Na' leczə ca' gaquəlencho beṇə' ljuežjcho ca' šə no choso'ochi' choso'osaquə' lega'aque'. Leczə gwžinlja ža chi saquə' chio'o zocho yežlyo nga.

⁴ Na' le'e nšagna'ale yoguə'əle leso do lažə'əle len no'ol chele o be'en chele, can' chene'e Diozən', na' bito talenle notə'ətezəchlə beṇə'. Diozən'

əgwnežjue' castigw che beṇə' ca' chəsə'əgo'o xtoi, na' beṇə' ca' chəsə'əbejyichj no'ol chega'aque' o be'en chega'aque' par chəsə'ənitə'əlene' beṇə' yoblə.

⁵ Bito cheyalə' selažə'əcho gaccho beṇə' gwni'a. Cheyalə' socho mbalaz len de'en de checho, chedə' cuin Diozən' bagwne' chio'o: "Bito ganlaža'a le'e na' bito cuejəyichja' le'e." ⁶ De'e na'anə' bito de de'e žebcho. Quinga guac əna to tocho:

Xana' Diozən' zoe' chaclene' nada'.

Na' bito žeba' šə bi de'en gone beṇəchən' nada'.

⁷ Legon xbab che beṇə' ca' boso'osed boso'olo'i le'e xtižə' Diozən', beṇə' ca' cuich nitə' na'a. Lega'aque' gosə'əzo gosə'əbeze' binlo yežlyo nga, na' cheyalə' sole gonlilažə'əle Diozən' can' gwnitə' lega'aque' gwso'onlilažə'ətezene'.

⁸ Can' naquə yichjla'aždao' Jesocristən' nej nase, ca'aczən' naquən na'a, na' ca'aczən' gaquən zejlicane. ⁹ Beṇə' zan choso'osed choso'olo'ine' che Cristən' pero na' nža' xen can' choso'osed choso'olo'i bale'. Bito güe'ele latjə yesə'əxoayague' le'e len xtižə'əga'aque'enə'. Zaquə'əchən si'icho yelə' chaclen che Diozən' lo'o yichjla'ažda'ochon' par nič sotezə socho gonlilažə'əchone' cle ca cue' yichjcho che bi de'en chəsə'əna beṇə' cheyalə' ye'ej gaocho. De'en che'ej chaochon' bito chaclenən' yichjla'ažda'ochon'.

¹⁰ Nezecho de que Jesocristən' bagwdixjue' xtolə'əchon' le'e yag corozən'. Pero na' beṇə' ca' ne'e chso'ot bia yixə' na' choso'ozeye'eb chsa'aquene' par yezi'ixen Diozən' chega'aque'enə', bito chaclenən' lega'aque' ca de'en gwdixjw Jesocristən' xtolə' chio'o beṇəch.

11 Bxoz ca' chso'ote' bia yixə' ze tgüiz güejə chəsə'əñabe' yezi'ixen Diozən' xtolə' yoguə' beñə' lao nasyon chechon', na' chjgua' bxoz əblaon' chennə' lo'o quart gan' nac che Diozən', pero cuerp chega'aquebən' choso'ozeye'en fuerlə syoda.

12 Na' can' goc che Jeso'osən', gwsote'ene' fuer syodan', na' yoguə' beñə' so'onlilažə' Jeso'osən' yeyac la'ažda'oga'aque'en xi'ilažə' por ni che de'en blalj xchene'enə'. 13 De'e na'anə' cheyalə' gonlilažə'əcho Jesocristən' na' bitoch naochi de'e ca' la'anə'əczə šə beñə' zan yesə'əgue'ine' chio'o de'en cuich naochon. 14 Gatə'ətezə zocho yežlyo nga, de'e te chein', pero chbezcho yežincho yoban' na' žjəyecho syodan' de'e cui te chei. 15 Laogüe de'en babocobə Jesocristən' yichjla'ažda'ochon' cheyalə' güe'echo yelə' choxcwlen che Diozən' dote tyemp na' güe'ela'ochone' len xtižə'əcho. 16 Cheyalə' sotezə socho goncho yoguə' claste de'en naquə güen na' cheyalə' əgwnežjwcho con ja'aque' guac əgwnežjwcho par gaquəlencho beñə' ca' cui de chega'aque', chedə' can' chene'e Diozən' goncho.

17 Le'e əgwzəxjw yichjle na' le'e gwzenag che beñə' ca' bagwlej Diozən' par choso'osed choso'olo'ine' le'e na' par chəsə'əgüia chəsə'əye' le'e. Lega'aque' chsa'aclene' le'e par nič ca' gonlilažə'əchle Diozən', na' cheyalə' yoso'odie' cuent laogüe'enə' can' chonle. Legwzenag chega'aque' par nič yesyə'əbeine' catə' yoso'odie' cuentən' na' cui yesə'ənite'e trist. Na' šə cui gwzenagle chega'aque' bitobi de'e güen gaquə chele.

18 Legon orasyon par neto'. Zoa' segor de que chonto' can' chazlažə' Diozən', na' chene'eto'

gonto' porzə de'e güen. ¹⁹ Che'enchgüeida' gonle orasyon chia' par niç yob gaquə yidəcha' gan' zolen'.

Chnabe' gaqualen Diozən' lega'aque'

²⁰ Laogüe de'en bnežjw cuin Xancho Jesocristən' blalj xchene'ənə', chac chon Diozən' de'en none' lyebe gone' par gaquəlene' chio'o. Na' cuat əžin ža cuich gone' can' bene' lyebe gone'. Xancho Jesocristən' gwxaquə'əlebene' ca to beṇə' goye xilə' tant nži'ilaž'e' chio'o. Diozən' bolis bosbane'ene' ladjo beṇə' guat ca', na' Dioz na'acžən' chone' par niç chzo chbezcho binlo len xbab de'en yo'o lo'o yichjla'ažda'ochon'. ²¹ Laogüe' nan' chona' orasyon chnaba' əgwletje' xbab güen lo'o yichjla'ažda'olen' na' gaquəlene' le'e par niç gonle yoguə'əlol' can' chene'ene' gonle. Na' chnaba' gone' ca gombi'achle Jesocristən' par niç ca' gaquə yichjla'ažda'olen' con can' chazlažə' Diozən'. Ledoye'ela'och Jesocristən' ṇa'a na' zejlicane. Na' can' gonšgaczcho.

²² Legon xbab che yoguə' consejw quinga de'en babena' le'e, chedə' bitotec bzoja' dižə' zan che to ton. ²³ Na' chyixjue'ida' le'e de que Temtion' babechoje' ližyan' na' chbeza'ane' nga. Na' šə yob yele'e nach chi'ane' catə' delaṇa'a le'e.

²⁴ Por part nada' le'e gguap diox beṇə' ca' bagwlej Diozən' par choso'osed choso'olo'ine' le'e na' par choso'ogüia choso'oye' le'e. Na' leczə ca' le'e gguap diox yoguə' noquə'əchlə beṇə' nitə' na' beṇə' bagwlej Diozən' par zjənaque' lažə' ne'ənə'. Na' beṇə' ljuežjcho ca' za'ac Italian' choso'oguaepe' le'e diox.

²⁵ Diozən' gaquəlenšgue' le'e. De'e na'azə de'e əchnia'.

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
d439ce34-67af-5db7-b82c-f44ad9932db2